

鼠

疫

抉

微

# 序

嘉定余君伯陶精於醫能擷中西之長而溝通之餘力工文詞能以勤究所得筆之書以貽後世以鼠疫近時始傳中土知其名者尙尠而世傳彙編約編兩書成於閩粵人之手不宜於長江流域也乃取而脩正之書成名曰鼠疫挾微以示余余讀之慨而歎曰宇宙之文化既開人事愈繁診癘之氣亦與之俱進發爲奇疾異徵往往爲昔人所不及知傳染之烈乃至城市爲墟若鼠疫者尤其甚矣歐西諸國警政脩明遇疫作有防禦之法無微不至其社會亦視爲大敵公私合力以謀趨避救治之策故雖屢有疫癘不至蒙其大害吾國警備未良地方自治方始萌槩驅癘衛生之事夙所未習海通已來五洲之民相率莅此奇疾怪徵挾以俱至醫者不察思以舊有之術應之不得當

則委之劫運罹疫死者歲輒有聞鼠疫之初始於滇南延及閩  
廣死亡瀕數十萬亦云烈矣近乃波及江淮諸省夫驅疫之策  
無過先事豫防警政與自治不可恃則唯望醫者之著述有以  
家喻而戶曉之得余君之書庶幾防患於未然而應變於臨機  
歟其功偉矣今歲秋冬閒疫徵發於滬北西人汲汲搜查閭巷  
騷然羣事抗拒不得則提攜兒女以謀奔避凡人之情於所不  
知強之使從則恆出於爭嚮使是書早出人皆知疫之可畏何  
至騷動若此余既敘此書以諗讀者而更惜其付梓之晚也

宣統二年十二月西林岑春煊

序

吾人特患無救濟之心存心救濟未有不通神明奪造化起死回生於俄頃者庚戌冬滬上西人查驗鼠疫居民惶惑遷徙紛擾伯陶先生起焉傷之思有以消斯民痼疾之灾取閩粵得效之方逐一研究窮源竟委未發之奇盡剖而出之顧疆域異宜稟賦懸殊既因方以詮釋不得不因病爲加減義顯理明苦心悉見洵所謂相得益彰者也是症國初發於滇南邦人名曰痒子病染此不起者數百萬萬殆傳至閩粵余目睹此方之取效捷若桴鼓先生薈萃羣書於症之源流方之精義闡發無餘先生是書厥功偉矣辱先生盛意與余商榷遂不辭而贅數語於後云

宣統二年仲冬月貴筑朱榮璪曉嵐

序

宣統庚戌十月上海租界譚傳鼠疫發現西人衛生局醫士查察居民以防傳染於是訛言四起紛紛遷徙閱旬日而始定吾友余君伯陶滬上名醫也因念鼠疫一症傳染極烈關人生命至大爰輯鼠疫抉微一書問序於予予當光緒甲午年需次粵東初見斯病其時省垣醫生鮮知其病所由來但名曰核症而無從考其核之所由起或從溫治或從涼治十死八九是年穗垣內外死於是疫者十餘萬人乙丙兩年斯疫盛於香港惠州戊戌粵省又作甚厲始知其病由死鼠之氣蒸傳於人於是家家捕鼠幾致搜掘無遺然傷人亦已數萬余友山陰董君一家上下慘死九人不逾五日也其時有曾爲陸豐尉之張君獨以防風通聖散一方加減當初起時投之輒應終日疲於奔命而

活人頗多迨庚子辛丑由潮州汕頭而至福州其殃人亦如甲午穗垣之酷是時粵閩醫士多能考察病源研究治法而鼠疫之書遂以首基嘗攷斯病之起在光緒辛卯始見於粵之高州越兩年而屬於粵垣迴翔於粵地者七八年蔓延而至於閩辛丑以後雖遺孽未淨而厥勢少殺矣西人最重衛生防疫尤切其懲於廣東香港潮州福州之役一傳染而死輒數萬人至十數萬人其注重斯症臨之如大敵視之爲切膚無怪其然也余攷吾國醫書凡疫癘之作俱曰天行從來有言地行者吾謂鼠疫之症其氣由地中行者也大陸山川各有界別其界相連則其氣相通如人身脉絡然沿海之地粵與閩爲一界浙與江爲一界齊與燕爲一界其界之顯而可指者山川之起伏其界之微而可察者人民之風氣界所至則氣所至有若鴻溝之畫者

斯疫自辛丑福州大作而後未聞至於浙至於江吾上海間有發現一二者蓋由輪舶攜帶而至非由地行來也是以傳染未至於烈然吾又謂疫癘之氣有天行有地行亦有人行三者傳染皆至疾人行之疫又多生於人煙稠密之區滬上彈丸地聚六七十萬人之多一傳十十傳百百傳千旬日之間癘氣瀰漫充塞可徧南北然則鼠疫即非由地行而至而以人傳人不亦大可懼哉今伯陶此書詳攷源流精選論說慎擇方法於鼠疫諸家之說搜括靡遺雖斯病之變未可方擬然大概已具讀是書者苟能神而明之其於斯病亦可十得八九矣然而治疫難防疫易已疫而治之無若未疫而防之是說也伯陶亦以爲然予與伯陶談醫素相合是書之成雖未獲襄助攷訂而不能不贊一詞故敘述臆說如此上海李鍾珏平書

序

吾鄉伯陶先生幼而岐嶷潛研經史弁髦科舉之業寢饋靈素之書昕夕不輟殆數十年造廬問道者日不暇給動奏奇效名震海內其相與遊者如朱曉嵐方伯李平書明府皆不以醫鳴於世而實於此道三折肱者也上下古今互相討論竟無厭倦砥礪益純邇來滬上檢驗鼠疫幸無大患然先生則謂余曰地球暗轉赤道潛移安見大江南北之必無是疫也繇是思患預防本胸中所素蘊者手著鼠疫抉微一書書成見示雜誦數過其辨症則條分縷晰論治則左宜右有信乎世有是病世不可無是書也無論通都大邑窮鄉僻壤允宜家置一編俾醫者病者如獲南指之鍼而不迷於所嚮則出險入夷易危爲安即轉瞬之間如反掌之易庶不負先生著作之初心也夫



宣統二年十二月同里陳柑巽倩

自序

今歲初冬某西醫在滬北偶見死鼠數頭其時附近居民適有病而死者西人遂瞿然驚惘然疑由其理想迺以爲鼠疫萌生之象焉庸詎知病人自病死鼠自死未必因鼠而及人因疫而致死也然而時疫流行每緣地氣含有溼毒鼠先受之而死死鼠腐臭與天時沴厲往往釀而成疫疫行而死亡枕藉并其屋舍器皿甯有穢氛著於物而中於人遂至傳染流行瀰漫無涯洵可畏哉可畏哉西人既有檢疫之議而吾人尤當有先事之防焉鼠疫一名核瘟同光以前無是名並無是書吳川吳君始輯鼠疫治法暨嶺南羅君增訂之鼠疫彙編八閩鄭君釐定之鼠疫約編其良方善法固已經驗於閩粵間然竊謂三江人士之體質及天時地候與閩粵懸殊而療治之方亦不得不斟酌

損益而變通之爰是不揣固陋參以辯論逐節按註名曰鼠疫  
抉微付梓行世以供同志之採擇尙希海內方家匡厥不逮云  
宣統二年庚戌十二月嘉定余德壩伯陶

鼠疫彙編原序

疫由陰陽愆伏而作也或中血或中氣感其毒者皆足以害人顧其時同其地同其證同其藥亦宜無不同

方醫所錄每次止立一方可知

必拘

拘切脈施方無當也鼠疫者鼠死而疫作故以爲名其證爲方書所不載其毒爲斯世所駭聞鄉復一鄉年復一年爲禍烈矣爲患久矣予初聞此遍閱方書無對證者光緒十五六年延及邑之安鋪十七年春延及縣城偶見醫林改錯一書論道光元年京師時疫日死人無數實由熱毒中於血管血壅不行夫已壅不行必然起腫予始恍然焉蓋鼠疫一證初起紅腫結核如癰癰或忽起於不自知或突起於所共見其潰者流瘀血非熱毒成瘀之明驗乎其甚者熱憎而斃非熱毒瘀血攻心所致乎及觀其方專以治血爲主略兼解表信能治此證矣試之人人

皆驗因錄示人人疑謗也十七年冬遇吳川友人吳子存甫於郡出所輯治鼠疫法一編予讀而善之遂與茂名許子經畚論列此方隨證加藥囑書其後而附於諸君子之末爰捐貲付刻以廣其傳十九年春城鄉疫復作同時屢用此方以起危證一時閩傳求者踵相接迺即人疑謗者再加辨解且取姪啓沃所經驗塗療一方以補之姪啓觀復刻印發遠近流傳用之多效二十年予族陀村感此證者數百用之全效故舊歲宏豐號有辨惑說之刻本年友人文子鳳笙有同育堂之刻安鋪醫局有敦善堂之刻化州局亦有刻人愈信傳愈廣焉予思此方雖妙惟一誤於醫者之蠱惑再誤於病家之遲疑以致死亡相繼實堪痛恨予留心此證久矣數年所歷更有聞見前緣平糶之暇補原起釋疑二則並將陀村治疫之善法與所傳之奇效及改

方之貽誤就吳刻而增損之二十一年陀村疫復作按治未效  
加藥方效故於施藥之時續而增之復將十年前疫毒中氣之  
經驗方附諸卷末俾知疫毒中於血氣者皆有所救則陰陽雖  
有愆伏而血氣實可調和庶幾消災疹於無形濟民生於仁壽  
則區區之心稍慰也如有不逮還期高明指示爰述其本末而  
爲之序

光緒二十一年蒲月廣東石城羅汝蘭芝園

鼠疫扶微

目錄

例言

病情篇

鼠疫推原

辨症淺說

驗鼠法

鼠疫探源說

避疫說

論巢源千金惡核

禱說 二則

論證 一

論證 二則

各證重輕辨 三則

辨脉 四則

治法篇

提綱 四則

條例 三十六則

刮法

刺法

紫草甘辨誤

藥方篇

鼠疫經驗方 十一則

古方 二十四則



萬國藥方 八則

吸毒石考 六則

醫案篇

羅芝園醫案 十八則

李兩山醫案 一則

劉蔚立醫案 五則

鄭肖巖醫案 十一則

# 鼠疫抉微

## 例言

一鼠疫素乏專書自吳子存有鼠疫治法羅芝園取而增刪之名曰彙編鄭肖巖又從而注釋之名曰約編茲就成書叅以己見畧加增損俾臻美善

一鼠疫證顯脈晦而有時不得不舍脈從症者蓋熱沸毒聚瘀凝血壅絡脉不宣毫無定準畧舉數則藉資考鏡

一原書所列治法皆由閱歷中得來三江與閩粵體質不同氣候亦異治法亦不得不量爲區別而斟酌其輕重云

一加減解毒活血湯專治鼠疫而是編卽爲鼠疫專書其餘一切泛治各疫良方概不攙入

一鼠疫醫案均係近賢經驗治法俾服藥者有所遵循將以是

編爲渡津之筏

一原書引用古方而不及詳載者是編槩行補入并按方繫以論說附列辯誤一條考證一條兼擇萬國藥方數則藉資互覽

一舊刻約編原有八篇茲特刪繁就簡分作四篇一曰病情二曰治法三曰藥方四曰醫案

鼠疫抉微病情篇

嘉定素盦余德壘伯陶氏輯

無錫陳麗江校

論說

鼠疫推原素盦

鼠疫初名核瘟同治間安南已有是病於光緒己丑辛卯間由安南傳之廣西壬辰癸巳歲漸傳之廣東之高州患疫而死者數萬甲午歲傳之廣州死者五六萬乙未歲高州又起欽廉亦相繼而作據云當時病家於地板下得死鼠無算始知疫從地氣而來鼠先染疫而死死鼠穢氣薰人感之卽病於是醫家用防風通聖散活血解毒湯頗著奇效其核多生於兩腋兩腿灣負痛甚劇須以分治之法治之方得平復丙申歲傳之雷瓊一

帶丁酉歲廣州復作己亥歲傳之惠州庚子歲由惠州而傳之汕頭潮州辛丑歲傳之福州兼及泉州是年榕城死者亦數萬厥後施治得宜遂無大患云

辨症淺說 素盞

鼠疫者疫之又一名証之又一種無鼠之疫疫不及鼠有鼠之疫鼠先受疫鼠疫又名核瘟言是症之必見結核也蓋疫毒惡血凝結成核核痛甚劇審是則鼠疫之必夾核核瘟之必夾癰益明矣然亦有鼠疫而核未卽發現者核瘟而未卽見死鼠者二者苟得其一是鼠疫之據倘使醫者不問病家之有無死鼠不問病人之有無結核辨證不得其要必致非鼠疫而誤指其爲鼠疫是鼠疫而不知其爲鼠疫貽誤良非鮮淺總之有鼠無鼠有核無核界限分明烏可混視安得不慎之又慎耶

驗鼠法素盒

染疫之鼠質堅毛鬆眼赤睛突每於夜間覓水恣飲陽光照射  
毒發卽死多見於水渠之上水甕之傍西人曾將疫鼠剖驗軀  
質不變惟腸間滿積瘀血與不染疫之鼠迥異故人觸其氣立  
病貓食其肉立死閩粵香港之醫檢驗所說僉同

鼠疫探源說

彙編

羅芝園曰昔之論瘟疫者皆曰風寒暑濕燥火之六氣自明末  
時吳又可起從而闢之曰六氣者天地之淫氣常有者也疫氣  
者兩間之戾氣濁氣不常有者也斯言也徵之老子而可見老  
子云大兵之後必有凶年凶年之後必有瘟疫是知以兵燹而  
致旱澇以旱澇而釀疵癘此瘟疫所由起也自後論疫氣者皆  
主其說陳修園先生更添病人之毒氣又兼言夫繼起不第言

夫初起也友人吳子存甫據鼠死疫作直斷爲地氣言之鑿鑿亦不爲無見然律以動靜互根之義無天氣之鼓盪焉能使地氣之發舒則言地氣者必兼言天氣其說乃全但天氣遠而清人所難見地氣近而濁人所易見耳統而言之曰天地之氣足矣言疫氣所從入吳又可吳鞠通楊玉甫皆謂獨從口鼻入玉甫又據天氣爲清邪獨從鼻入地氣爲濁邪獨從口入修園謂天地之氣暗中摩盪從毛孔入病人之氣當面噴薄從口鼻入似不必拘蓋自其分而言則曰天地人之氣自其合而言則曰混雜之氣何能隔別使何氣從口入何氣從鼻入何氣從毛孔入乎主口鼻入者對風寒由毛孔入而言別樣疫證可說得去惟鼠疫實說不去其先起核而後身熱者必由毛孔入由外而入內其先身熱而後起核者必由口鼻入由內而入外此證之

犁然各別者也所論雖屬探原究無闕治病之輕重管見偶及川以質諸高明吳子存曰光緒十六年冬閒鼠疫盛行疫將作則鼠先死人感疫氣輒起癰癰緩者三五日死急者頃刻醫師束手閒有打斑割血用大苦寒劑得生者十僅一二而已先是同治閒此證始於安南延及廣西遂至雷廉沿海城市至是吳川附城作焉明年正月梅菜黃坡及信宜東鎮皆有之三月後高州郡城亦大作斃者每以二三千計離城市稍遠者染得病歸村鄉亦有之四月後則癰癰者鮮死死者又變爲焦熱衄血疔瘡黑斑諸證初有知廣西雷廉之事者勸諸人亟逃人皆迂之久之禍益劇乃稍信前說見鼠死則盡室以行且多服解毒瀉熱之品由是獲免者甚衆越端午乃稍稍息事後細詢中疫之家乃歎曰信哉此地氣非天氣也何者同一邑也城市者死



山林者免焉同一宅也泥地黑濕者死鋪輒築灰者免焉暗室蔽風者死居廳居樓者免焉況一宅中婢女小兒多死坐臥貼地且赤足踏地也婦人次之常在室也男子靜坐又次之寡出不舒散也且疫作時其宅每熱氣從地升猛者如筒煙上噴緩者如爐煙繚繞觸之則頭暈目赤而心燥急取涼風吹解病乃可救當其時宅中人爲氣所感懵然不覺也旁觀者見熱氣自足而脛而股而腰若不出見風熱氣逼至胸膛喉舌閒則病作矣有平時在墟市得病者昇歸家其轎門迎風者愈閉轎門者竟死且有棺斂將葬盜盡竊其衣服夜得風露涼解遂生者其故亦瞭然矣所可恨者富貴之人珍重太過不敢見風不肯服寒峻之品遂至韃熱不救至婢女得病又慮其傳染病未甚即棄置不顧此眞俗見之悞也夫鼠穴於土中受地氣獨早也顧

其死者目必突而赤頃刻有蛆氣極臭穢移置他處轉面向風勿觸其氣嘗有鼠朽腐箱內婦女開箱觸其臭即暈跌死有見死鼠甚巨舞摩玩弄而後瘞之歸坐即死有鼠將死而貓噬之貓死人食其貓人死高州城外瘞鼠處牛斃其草牛死犬亦如是彼鼠之生者則渡水遠逃常銜青草但不知此草何名可以作治疫之藥否所逃之處則皆清涼近水之區也旣而匪徒徧傳放藥藉端滋事人心惶惑或謂是疫皆毒藥所致識者非也所慮者廣西雷廉二十年來皆十一月疫起五月疫止城市者重村落者輕恐高州亦難免後禍吾不知醫無從剖析方劑姑就所聞於朋友者述其避法治法於後

避疫說 鼠疫治法

吳子存曰避之之法當無事時庭堂房屋洒掃光明廚房溝渠

整理潔淨房閒窗戶通風透氣凡黑溼處切勿居住聞近鄰有鼠死即要時時照察埋鼠時掩鼻轉而勿觸其氣如誤觸其氣急取逆風吹散之此內經所謂避其毒氣天牝也也從來復得其往之法也並宜時常用如意油拭鼻以避邪氣家中人不可坐臥貼地奴婢小兒俱要穿鞋農人亦宜穿草鞋以隔地氣各分界俱穿鞋赤脚者多死後疫勢稍急即宜遽避得大樹下陰涼當風處為妙樹下避疫外夷法也或泛舟水上尤妙否則居近水當風處亦佳雷廉十餘年凡船戶及蟹家即漁戶棚從無犯此證者可知也水以大江大塘為勝若止水小塘當疫發時無不翻底黃濁者然仍勝於無水處若不得近水則嶺頂四而當風處亦好各可避則每日全家男女俱出屋外有樹木處高坐吹涼夜閒回

避居嶺頂者有禍居嶺頂者安得風故也居城者能上城堞避之亦可高州居城者俱平安倘無處

家仍要開窗透風且用極幼細之沙厚鋪牀底將房閒屋瓦拆開見天自然平安設避居他宅必須清涼疏爽不可衆人擁雜一處反易致病倘或感病即時移出大樹下當風處必要高牀高檯切勿近地若近地則感受毒氣更速之死觀避出而睡平地者死反多於在家其故可知也平時不可食煎炒太熱物不可飲冷凍湯水男女或因房事感起者難救尤宜戒慎節慾爲是

論巢源千金惡核素靈

攷之古人書中初無所謂鼠疫而乃與今之鼠疫若合符節者惡核是也名雖不同理實一致偶錄數節以備參稽巢源曰惡核者肉裡忽有核累累如梅李小如豆粒皮肉燥痛左右走身中卒然而起此風邪挾毒所成其亦似射工毒初得無常處多

惻惻痛不即治毒入腹煩悶惡寒卽殺人又千金曰惡核病者肉中忽有核累大如梅李核小者如豆粒皮肉疼痛壯熱瘰癧惡寒是也與諸瘡根癰癰結筋相似其瘡根癰癰因瘡而生似緩無毒惡核病卒然而起有毒若不治入腹煩悶殺人皆由冬月受溫風至春夏有暴寒相搏氣結成此毒也但服五香湯主之又以小豆末傅之亦煮湯漬時時洗之消後以丹參膏傅之令餘核盡消凡惡核初似被射工毒無常定處多惻惻然痛或時不痛人不痛者便不憂不憂則救遲救遲卽殺人是以宜早防之尤忌魚鷄猪牛馬驢等肉其疾初如粟米或似麻子在肉裏而堅似炮長甚速初得多惡寒須臾卽短氣速服藥令毒散止卽不入腹也入腹則致禍矣切慎之又曰惡核癰病瘰癧等多起嶺表中土尠有南方人所食雜類繁多感病亦復不一仕

人往彼深須預防防之無法必遭其毒惟須五香湯小豆散吳茱萸皆其要藥按伊古以來事有萬變而莫測者斷之以理則一也病亦有萬變而不窮者治之以法則一也矧其惡核與鼠疫明明一致者乎連屬而載之比類而書之竊思鼠之生滅於人間不自今日始也卽鼠之足以釀疫亦不自今日始也古人僅發明病之由於核而未曾發明核之由於鼠茲引千金諸書所云惡核以爲鼠疫之一大明證高明者幸勿哂其臆度也

附襍說二則

趙州師道南今望江令師範之子也生有異才年未三十卒其遺詩名天黑集頗有新意五言如海霞明雁路松日淡僧衣一庭如野闊雙鶴並人長均係未經人道者時趙州有怪鼠白日入人家卽伏地嘔血死人染其氣亦無不立殞者道南賦鼠死

北江  
詩話

行一篇奇險怪偉爲集中之冠不數日道南亦以怪鼠死奇矣

同治之初滇中大亂賊所到之處殺人如麻白骨飛野通都大邑悉成邱墟亂定之後子遺之民稍稍復集掃除齕齧經營苦蓋時則又有大疫疫之將作其家之鼠無故自斃或在牆壁中或在承塵上人不及見久而腐爛人聞其臭鮮不病者病皆驟然而起身先憤起一小塊堅硬如石顏色微紅捫之極痛旋身熱譫語或逾日死或即日死諸醫束手不能處方有以刀割去之者然此處甫割彼處復起其得活者千百中一二而已疫起鄉間延及城市一家有病者則其左右十數家即遷移避之踏於道路者無算然卒不能免也甚至闔門同盡比戶皆空小村聚中絕無人跡老子云師之所處荆棘生焉信矣馬星五觀

察騶良雲南人爲余說如此蓋其所親見也

曲陽  
集記

病情

論證一彙編

溫疫者天地之戾氣濁氣釀爲熱毒中于人亦證見熱毒故曰  
溫家家如是若役使然故曰疫其病皆熱無寒有表證無表邪  
宜解肌禁發表其輕者如赤眼發頤之類其重者如頭腫頸脹  
之類然祇見於一處一年未有見於處處年年如鼠疫之甚者  
噫異矣慘矣其初起也有先惡寒者有不惡寒者既熱之後即  
不惡寒有先核而後熱者有先熱而後核者有熱核同見者有  
見核不見熱者有見熱不見核者有汗有不汗者有渴有不渴  
者皆無不頭痛身痛四肢痠痺其兼見者疔瘡斑疹衄嗽咯吐  
甚而煩躁懊懣昏譫顛狂痞滿腹痛便結旁流舌焦起刺鼻黑



如煤目瞑耳聾骨痠足腫舌裂唇裂脈厥體厥種種惡症幾難  
悉數無非熱毒迫血成瘀所致故古方如達原飲消毒飲解毒  
湯敗毒散近方如銀翹散桑菊飲等皆能清熱解毒然用之有  
效有不效何哉以有清解熱毒之藥而無活血去瘀之藥也可  
知用清解者尙誤更可知用溫補者益誤矣或曰有用涼劑愈  
者此必熱毒初起血未成瘀之時或曰有用補劑愈者此必熱  
毒已解瘀血已下之後然可偶效斷不可常效惟王勳臣活血  
解毒湯雖制以治霍亂之疫然治此證實爲得宜其論證曰熱  
毒自氣管達於血管將氣管凝結壅塞不行恰與此證合其制  
方則解血毒清血熱活血瘀亦恰與此症合十七年閱得此方  
於無可救藥之時偶一試之不意其竟著奇效也夫治病以本  
病爲重標病爲輕此證熱毒本也瘀血標也而標實與本同重

故標本未甚者原方可愈標本已甚者又非原方可愈故於重危之證傳表宜加白虎傳裡宜加承氣毒甚宜加羚羊是不欲以輕劑治重病也自後詳求博訪十九年訪知西藏紅花去瘀捷效重危之症必要連追三服遂增前法是又不欲以緩服治急病也廿年訪知生竹茹止吐遂將吳刻增損除其統用下法二方分別重危證服法治案九則廿一年試知誤艾火誤參朮誤時日皆有可救強壯之重危證三服仍熱與熱退復熱及初起症見至危又非前法所能效並訪知復病猝死之故又增前法並治案三則是又合重劑急服以治重急病也以上立法大綱已具可十愈八九矣秋初渡瓊購書數種更有所悟而著效益奇前謂不可減少減輕者爲初證言耳如連追後汗出熱清可減除柴葛毒下瘀少可減輕紅花並可加減以滋陰退熱亦

可加減以補虛消核更得清氣熱法清榮熱法表裡雙解法三焦合治法增液助汗法增液助下法復脉救危法厥證急下法並善後二法稍爲增入以補前法之未備雖未及詳細祇取簡明庶治鼠疫者不混於他疫於世不無小補焉耳

論證二彙編

疫由天地之氣固矣然天氣下降地氣上升此常理也何以變而爲疫吾嘗驗於城市鄉村間而知其故矣蓋城市污穢必多鬱而成疹其毒先見鄉村污穢較少鬱而成疹其毒次及故熱毒熏蒸鼠先受之人隨感之由毛孔氣管入達於血管所以血壅不行也血已不行漸紅漸腫微痛微熱結核如瘰癧多見於頸脇臑膀大腿間亦見於手足頭面腹背爾時體雖不安猶可支持病尙淺也由淺而深愈腫愈大邪氣與正氣相搏而熱作

矣熱作而見爲頭痛身痺熱甚而見爲大汗作渴則病已重矣  
若熱毒愈深瘀血愈甚泛見於外則疔瘡逆而妄行則衄咯疫  
毒深入則譫語等證皆危證也若疫氣由口鼻氣管入熱毒直  
達臟腑初病暴作熱渴痛痺昏憒等證或疫證盛時猝不省人  
事手足抽搐面目周身紅赤皆未見有核病四五日即見目瞑  
耳聾唇焦舌黑等證其病更深其證更危甚而服藥即吐牙關  
緊閉亦可救救法載各證治法條下至脉厥體厥面青面藍與  
噴血不止者更可知矣至危之證有熱後見核者其初雖與傷  
寒傷風同然絕不同也蓋此由熱感咳嗽無鼻涕頭痛無項強  
渴甚喜冷飲熱後不怕風並見神氣昏迷手足痠痺且脉右盛  
於左相類而實不類其猝不省人事手足抽搐亦與風症脫症  
異蓋風症脫症面目周身不紅赤也細辨自知見核作熱在出

癰疽之時亦宜服此方以此症至危至速此方亦兼治癰疽即有熱無核而慮其出癰疽驗之兩耳尾兩中指尖不冷知非癰疽也服藥後口漱瘀血小便如血大便下血婦女非月信血至係瘀血外行爲順症不必慮初愈後手足微冷氣血未達也與本症之熱厥異與虛寒之寒厥亦異經一晝夜自暖愈後七八日不大便精液未充也與前之熱毒秘結異愈後身與足浮腫氣復而血未復氣無所依附也與氣滯而鬱之氣腫異與水泛而溢之水腫亦異二三日血復自消重危之症初不急追多服日夜惟二服至六七日汗出瘀下病愈人困幾無人色昏昏熟睡脉亦和緩無汗因也非脫也以上四症皆足駭人切勿溫補寒下破氣利水以致虛而又虛熱退復熱余見多矣無庸慌張惟食取清潤藥用滋陰安靜調養十餘日愈矣證已屬熱藥忌

補散凡麻桂薑附一切焦燥溫補之藥初不宜用即熱未盡除核未盡消仍不宜用芩連苦寒清熱必用然苦寒化燥尤不可過用各有專經亦不可紊亂用詳見瘟疫論諸書黃消善下攻邪必用然亦未可驟用蓋初病發熱邪尚在表遽下必陷入裡必見脹痛結流及脉厥體厥六證見一方可速下宜速下者不宜遲宜重下者不宜輕若老弱宜酌下切勿遲疑自誤即退熱之藥亦有未可誤用如地骨皮能治骨蒸虛熱何首烏能退入裡陰邪此證誤用必引邪深入熱難退而足腫矣熱清核未盡消仍宜戒口凡生冷熱滯有毒等物切不可食初起微熱固忌艾火房事熱初退尤忌冷粥熱粥悲傷惱怒亦忌飽食夫鼠疫陰也血亦陰也以陰感陰最爲易入婦女屬陰中毒尤多故其症每起於陰盛之時而消於陽盛之候

鄭按論症及禁忌將鼠疫病情抉剔無遺簡練精當洵爲不朽之言非十年臨症細心揣摩未易具此大識力

據按羅氏剖察病情如老吏斷獄羅列治法如名將談兵以活血去瘀之方劃清主治鼠疫界限允推千古隻眼

各症重輕辨

彙編

核小色白不發熱爲輕症宜戒口戒色切不可忽亦宜急治  
核小而紅頭微痛身微熱體微痠痺爲稍重證若面目紅赤旋  
必大熱渴痛痺照重證治

單核紅腫大熱大渴頭痛身痛四肢痠痺爲重證或陡見熱渴  
痛痺四證或初惡寒旋見四證未見結核及舌黑起刺循衣摸  
床手足擺舞脉厥體厥與疫證盛時忽手足抽搐不省人事面  
身紅赤不見結核感毒最盛壞人至速皆至危證

# 辨脈

傷寒論辨脈篇曰寸口脈陰陽俱緊者法當清邪中於上焦濁邪中於下焦清邪中上名曰潔也濁邪中下名曰渾也陰中於邪必內慄也經文止此首句論脈下數句言邪中三焦陰陽爲邪搏激寸口之脈必緊仲景論熱證止此數句而不見方想當時必有其書但久經兵燹故散亡耳此後人所憑以診溫證之脈卽憑以診瘟疫之脈也

吳又可論瘟疫之初起其脈不浮不沈而數晝夜發熱日晡益甚頭痛身痛其邪在伏脊之前腸胃之後熱邪傳表則脈浮而數傳裏則脈沈而數

吳鞠通論瘟疫初中上焦脈不緩不緊而動數或兩寸獨大尺膚熱傳至中焦在表則脈浮洪躁甚在裡則脈沈數有力甚則



脈體反小而實更甚則脈沈伏或並脈亦厥傳至下焦或見沈實或見躁盛或見沈數或見虛大或結代或見細促甚有兩至與無者

楊玉甫論瘟疫初起脈不浮不沈中按洪長滑數右手反盛左手總由怫熱鬱滯脈結於中故也凡浮診中診浮大長而有力傷寒得此脈自當發汗麻黃桂枝證也溫病初發雖有此脈切不可發汗乃白虎瀉心證也死生關頭全分於此若熱之少陰則脈沈伏欲絕非陰脈也陽邪閉脈也凡傷寒始本太陽發熱頭痛而脈反沈太陽證而見少陰脈故用四逆湯溫之若溫病始發未嘗不發熱頭痛而脈見沈瀦而小急此伏熱之毒滯於少陰不能發出陽分所以身大熱而四肢不熱此名厥正雜氣怫鬱火邪閉脈而伏也急以鹹寒大苦之味大清大瀉之固不

可誤爲傷寒見少陰而用四逆湯以溫之溫之則壞事矣亦不可誤爲傷寒見陽厥而用四逆散以和之和之則病甚矣蓋熱鬱亢閉陽氣不能達於四肢故脈沈而濇甚至六脈俱絕此脈厥也手足逆冷甚至通身冰涼此體厥也卽仲景所謂陽厥厥淺熱亦淺厥深熱亦深是也下之斷不可遲非見眞守定通權達變者不足以語此手足微厥者不可下凡溫病中診洪長者輕重則脈沉甚則閉絕此辨溫病與傷寒異治之要訣也

羅按溫症始於太陰肺肺爲右寸仲景先師曰寸脈緊急者卽後人所謂數見汪訓菴素難經注吳又可云不浮不沉而數吳鞠通云不緩不緊而動數楊玉甫云不浮不沉中按洪長滑數右手脈盛於左手則初症之脈數諸說所同惟右盛於左玉甫所獨則診鼠疫初證之脈如見不浮不沉不緩不緊而數右盛於左兼初起四肢痿痺可知無核之鼠疫矣至傳變諸脈三家大畧相同

鄒按鼠疫盛行之時凡初證中按有數象右盛於左且肌熱肢痺眼赤口渴核  
卽未見亦是感疫之症決不可作風寒治誤服辛溫之藥如麻桂荊防羌獨活  
之屬若核既見或已誤藥誤時當信守本方加減舍脈而從症蓋此時熱沸毒  
聚瘀凝血壅絡脈不舒切亦不準況症至危重有邪閉清竅脈伏而澀亦有閉  
甚無脈者若沾沾然拘守脈法於三指下推尋甚無當也

又按張石頑有云時疫之邪皆從濕土鬱蒸而發土爲受盛之區平時汙穢之  
物無所不容適當邪氣蒸騰不異瘴霧之毒人觸之者皆從口鼻流入而至陽  
明之經脈必右盛於左可見楊玉甫所云右手脈盛於左手亦有所本羅廣文  
引之爲證可爲司命者獨具手眼然此可爲初起之證立切脈之法若至危重  
變候則脈又不足憑矣

堦按疫症初起吳又可云其脈不浮不沉而數楊玉甫云不  
沉不浮中按洪長而數右手盛於左手皆言其常非言其變

也然疫脈奇險詭怪無一不有安可以萬變之症而預隸之於脈乎吳山甫脈語曰東垣著此事難知謂脈貴有神有神者有力也雖六數七極三遲二敗猶生此得診家精一之旨也節菴辨傷寒脈法以脈來有力爲陽症沉微爲陰症此發傷寒家之矇瞽也杜清碧診論曰浮而有力爲風無力爲虛沉而有力爲積無力爲氣遲而有力爲痛無力爲冷數而有力爲熱無力爲瘡各於其部見之此得診家之領要也以上數則皆診脈要旨一隅三反尤貴心領神會勿拘拘於三指間爲幸

鼠疫扶微治法篇

嘉定素倉余德壩伯陶氏輯  
無錫陳麗江校

治法

提綱

此證壞人甚速誤藥固死誤時亦死無錢服藥亦死我村惟不  
忽人所忽絕無懷疑專信此方非疫初起時早晚必慎視小兒  
詳詢婢僕見有微核身未熱者急用塗藥一二日愈矣有核而  
頭微痛身微熱者急服塗藥施亦一二日愈矣故於初起時已  
十愈八九閒有重證按證加藥照日夜連追法亦二三日愈矣  
即有一二危證照即時連追法亦四五日愈矣貧賤復得所救  
亦無傳染乙未陀村患病雖有百數而貽誤曾無一人彙編

凡毒盛證重見核無熱內服外塗照方三四劑愈見核微熱日  
夜二服五六劑愈重證危證照方加藥老弱用單劑連追法石  
膏大黃用<sub>五</sub>錢均可強壯用雙劑連追法石膏大黃用七錢壹  
兩兩餘外用布包藥渣溫熨周身或括痧拈痧或核腫大放血  
更好有三四服熱漸退者有五六七服熱漸退者初稍誤時有  
十餘服熱漸退者熱退未清即緩服藥反復遷延甚有三四十  
服然後痊癒者強壯毒盛合計石膏有服至柒捌兩者大黃有  
服至叁肆兩者羚羊犀角有服至肆伍兩者西藏紅花有服至  
貳叁兩者桃仁紅花有服至斤餘二斤者強壯病重乘其元氣  
尙盛三四日即服至十一二劑雖至危重約十餘二十劑必愈  
熱清而核亦消元氣少損愈後而人不弱若遲緩服藥必誤事  
即不誤事日久病深服藥必加熱清而核不消元氣漸損愈後

而人亦弱初愈時必昏昏思睡數日若初起誤灸誤參必壯熱

昏憒隨見謔語其死必速救法急用雙劑加樸硝三錢大黃七錢

兩一能加羚羊犀角西藏紅花各三錢更好難取亦不必用瀉出

瘀血涎沫十可救七八若不急下百無一生是年本鄉疫初起時一見十餘證醫者不知

誤灸五人誤參四人次日皆死後鄰里有誤救以重下多得生者最可憐者重危之證少服未效即行

置手以致於死實可痛恨有氣服藥尚可救生切勿置手同上

鼠疫治法皆予數年來詳求博訪經驗而得故其中利弊言之

獨詳親用救人不止千矣傳用救人不止萬矣無如方初到處

人多疑之夫已疑此方必誤用別方所願諸君於一誤之後不

可再誤即宜及早回頭急依方照法以治之所列稍輕稍重之

證可救十全至重至危之證可救七八若醫者任意更改以逞

神奇病家率意煎調以至焦灼或中道改圖或半途即止仍係

自誤勿謂言之不早也 同上

以下所謂原方者即鼠疫經驗方也所謂加者加於原方之內也並加者加外又加也照加者照上加也所謂輕加白虎者石膏五錢知母三錢也重加者石膏一兩或兩餘知母五錢也桃仁紅花必重用大黃石膏有時亦必重用至重危之症必照方照法加重急迫尤以不誤藥不悞時爲要 同上

據按羅氏分別證治規定治法綱舉目張抉發靡遺俾閱者一目了然不患用藥無着手處矣

### 條例

輕症照原方一服

所云原方即羅氏加減解毒活血湯下微此

稍重症日夜二服加銀花

竹葉各二錢如微渴微汗加石膏五錢知母三錢少則二三劑愈多則六七劑愈未愈不妨再服



鄭按輕症照原方一二服無不應如桴鼓至稍重症微渴微汗熱邪尚在氣分白虎湯只用石膏知母者防胃津被劫也不用粳米甘草者恐留邪蘊毒也未愈再服即急迫多服法也初起如能遵行亦何至毒深變危潰膿成瘡耶

燠按口渴自汗由於氣分之熱將熾耳從原方佐白虎乃兼清陽明經症之熱也渴字汗字均須着眼

重症危症至危症初起惡寒照原方服柴胡葛根各加一錢若見大熱初加銀花竹葉各三錢西藏紅花一錢危症錢半如無西藏紅花本方紅花可用捌錢或加紫草

燠按原本於紫草下多一草字茲已刪去詳按紫草

以耳三錢或加蘇木三錢亦可

鄭按重症危症必重加紅花者所以急於去瘀也惟去瘀方能活血亦惟活血方能解毒夫然後方中柴葛乃能升邪外解矣彼畏桃紅如鳩毒者曷不細味神農本草而憬然悟乎

壅按疫症之至危者固屬熱毒蘊結而瘀血凝滯者尤多今既欲重加紅花以通瘀又恐病家畏怯不服乃復以紫草蘇木等藥代之於避重就輕之中仍寓活血解毒之意其參變處具見斟酌

若熱渴至憊有汗並加白虎湯強壯者石膏

原注少七錢多一兩知母

原注少三錢多五錢

粳米五錢本方甘草改三錢是也

鄭按第一章稍重症微渴微汗故但用石膏知母此則因重症危症熱渴至憊有汗必大熱大渴汗出淋漓神又將昏恐陽明津液亡矣故加粳米甘草以救之

壅按第一條但云微渴微汗是陽明之熱將熾而未甚也此條既云熱渴神昏是陽明之火炎上熾矣不但本方之白虎宜加重即本方之枳櫟亦宜減輕而當歸桃紅俱宜酌用

疔瘡加紫地丁三錢疔黑者用針圍刺括出毒血外用藥粉頻塗以拔疔毒

鄭按毒入愈深瘰癧愈甚泛見於外則有疔瘡夫鼠疫發核後又加生疔則毒重症危原方加紫地丁者解疔毒也然洋菊葉爲疔解毒聖藥用鮮的搗汁冲服取效尤捷

壘按程山齡曰療疔之法內服莫妙於菊花甘草湯外敷則取千金諸法

小便不利加車前草三錢

須用鮮的較

痰多加貝母三錢危症本方

翹芍地草各加一錢至危症四味各加二錢並加重白虎竹葉銀花各三錢羚羊角犀角西藏紅花各錢半皆宜日夜連三服

鄭按此節申明重症危症加味分兩並急迫連服法發核之症挾痰者多本方加貝母特舉一隅耳蓋痰阻膈上則本方歸地陰柔不能活血反慮粘痰加貝

母固屬至穩不如再加鮮萊菔搗汁沖服尤靈或用鮮荸薺洗去皮白海蜃洗去礬煎湯代水爲引更見靈妙

據按鄭氏所增治痰諸藥頗爲可取若痰壅神昏又非前藥可治當加鮮石菖蒲根鮮竹瀝或礞石滾痰丸等功力較勝

服後熱渴仍不退照原方雙劑合服日夜各一服惟柴葛歸可照加倍各酌減一錢樸酌減五分餘俱加倍仍加重石膏知母竹葉銀花羚羊角犀角西藏紅花也

鄭按雙劑合服且日夜各一服卽大劑急服法也鼠疫之症病勢岌岌若再疑惑舍是方而別求治法或減輕分兩則去生不遠矣惟有遵守是方放膽服之藥力一到無不易危爲安

據按前條特舉急迫連服法此條復舉雙劑合服法蓋因疫

毒已深千鈞一髮之際救命惟仗服藥服藥惟仗胆大病勢不退不可停藥所以不憚唇舌勞敝反復諄諄者無非救世心切耳兩酌減字俱教人叅用活筆法

雙劑服後熱渴仍不減不妨雙劑照加再服數劑以熱渴退爲度熱渴退而未清切不可止藥用單劑日夜二服仍按症加藥稍爲酌減熱初退時切忌食粥

鄭按熱初退卽食粥食後少頃卽死曾見數人可不慎歟

壘按熱退未盡是胃邪未清一經飲食則餘燼復燃何異資寇兵而廣盜糧哉故輕則反復重則立斃醫家病家尙慎旃哉

若外熱減而裡熱不減胃熱內蒸亦必神昏譫語加鮮竹葉三十片石膏五錢知母三錢天花粉三錢甘草一錢日夜連服以

退爲度抑煩熱未清畧有譫語者將所加諸藥量爲酌減

堦按此條畧叅拙意仲景竹葉石膏方本爲除陽明煩熱而設不用粳米者恐其留邪耳至於煩熱未清畧有譫語是病勢又減則所加之藥亦當從輕

若見顛狂雙劑合服加重白虎並竹葉心羚羊角犀角西藏紅花各三錢照上服法顛者捉住灌藥牙關緊者撬開灌藥皆要扶起牽仰其首用錫壺入藥灌之自易

鄭按廣州府施太守所刊良方云鼠核神識昏迷或狂走大叫毒氣遍走內外口生瘡或大便不通皆熱毒內攻急服紫雪丹徐靈胎云邪火毒火穿經入臟無藥可治惟此丹能消解其效如神鄙見疫症若見神昏譫語顛狂則毒火已經走竄非佐以紫雪丹未易奏功或用此丹一二錢研末以新汲水調下或照本方煎成冲服亦可

壅按熱毒內竄再當加入金汁或以陳臘雪水煎藥更佳  
病稍退後若服藥卽吐乃熱毒攻胃先以鮮竹茹三錢煎水煎  
服之服藥自不吐

鄭按熱毒攻胃胃火不降勢必上逆而作吐用竹茹降胃逆加鹽輕搓能引火  
下行故止吐

壅按吐屬胃嘔屬肝伏熱上干肝胃則有吐嘔等症鹽搓竹  
茹雖能清熱究嫌力薄而止吐不若佐以黃連橘皮止嘔不  
若佐以黃連吳萸皆最妙之法

熱毒入營舌絳而乾反不渴加清營湯犀角元參麥冬銀花各  
三錢丹參二錢台本方連翹生地是也並加西藏紅花錢半日  
夜連三服未愈再照服

鄭按羅廣文每遇貧苦不能備藥必設法改用以竹葉心燈心紫草蘇木代犀

鈴藏紅花等藥仙手婆心於斯窺見一斑

壘按上條是熱鬱氣分此條是熱鬱營分蓋熱雖不同其內熱則一也原方柴葛均須減去餘可仿此

血從上逆見衄咯等症加犀角地黃湯犀角丹皮各三錢本方生地黃改一兩赤芍仍舊是也並加西藏紅花錢半日夜連三服未愈照再服

鄭按熱毒入營迫燥陽絡血從上溢本方非再加犀角地黃湯萬難奏功

壘按營熱內熾當易鮮生地或更以鮮生地搗汁再加鮮茅根鮮蘆根爲要

見斑加化斑湯即白虎湯加元參三錢犀角二錢是也見疹加銀翹散銀花牛蒡子各三錢竹葉大青葉丹皮各二錢合本方連翹甘草是也二症多見於大熱後當大熱時見宜日夜三服



若微熱時見日夜二服若舌苔微黃外微熱而內煩惱懊憹加元參沙參梔子黃芩各三錢或並加淡豆豉二錢日夜三服皆以愈爲度

鄭按疫風發核二三日內或見斑或見疹雖斑重疹輕究皆胃中熱毒熾盛或加化斑湯或加銀翹散方中肯亦須多服乃克有濟至外熱內煩懊憹則加元參黃芩梔子等味皆不貽聖賢矩度

壙按斑從肌肉而出屬胃疹從皮毛而出屬肺肺胃皆熱故斑疹並見然亦不宜多見蓋斑多者邪重也斑更有藍黑二種光澤者易治紫黯者難治疹亦有紅白二種紅潤晶瑩者易治紫艷枯白者難治

若按症加藥按時服藥服藥已多熱毒已解其瘀或從經絡散或從咳嗽出或從二便下其病必輕縱核未消將原方加減接

服便可收功

鄭按此節總結上文可見毒解癰化皆賴按症加藥按時服藥方有效驗

壘按此條申明鼠疫初起苟能按法施治無不即愈之理所云加減接服者亦教人於病愈之後正不必拘定原方也

有體壯毒盛有誤服忌藥助毒致盛者有改輕改緩積毒致盛者此時猶不按證加重急迫多服必無望矣其證核愈腫大面目紅赤舌胎老黃午後熱甚若兼見渴強壯者加重白虎湯上見脈浮而促加減味竹葉石膏湯竹葉五錢石膏八錢麥冬六錢本方甘草改三錢是也二證能加羚羊角犀角西藏紅花各錢半更好或加梔子黃芩各三錢亦好皆宜日夜連三服未愈再照服以熱退爲度

鄭按此皆誤時誤藥少服緩服所致其證面目紅赤舌苔老黃午後熱甚若兼

口渴皆陽明熱毒熾盛故重加白虎湯倘有脈浮而促故加竹葉石膏湯此二證能再加羚羊犀角藏紅花尤見得力或加梔子亦可然服法必須日夜連服也

壅按毒盛之由既非一致如因誤服忌藥者即以萊豆生菜煎汁解之

熱退未清忽惡寒旋大熱是謂戰汗汗透熱解若人虛汗出未透致熱未清宜加增液湯以助其液汗出自透元參一兩麥冬與本方生地各八錢是也日夜二服

鄭按疫症有戰汗亦泄邪大機括魏柳州云脈象忽然變伏或單伏而四肢厥冷或爪甲青紫欲戰汗也宜熟記之

壅按應汗不汗應下不下或多汗多下均致正虛邪實遂有戰汗何哉正能勝邪一汗而病愈正不勝邪不汗而病變若

戰而不汗者尤凶定可於脈之靜躁神之安煩汗之有無一決其順逆也

餘熱未退小便閉而譫語加車前木通各二錢羚羊角犀角各錢半貧者加車前木通淡竹葉竹葉心各二錢日夜二服以小便利熱退清爲度熱退清閒有譫語亦無妨矣加淡竹葉竹葉心各錢半每日一服數服可愈也

鄭按此譫語由小便閉故以通小便爲主熱邪從水道而出譫語自平如熱既退清閒有譫語此君火未甯故加竹葉竹葉心合本方之生地亦仿導赤意也  
壅按譫語而小便閉者其膀胱之熱亦由陽明而來吳又可曰熱到膀胱者其邪在胃故重於清胃而畧於利便試觀所加之犀羚羊其用意可知矣鄭氏所云以通小便爲主語殊欠妥

透而大熱不渴舌黑起刺腹脹腹痛大便結而譫語熱結旁流  
體厥脈厥六證見一皆宜下此時危在旦夕宜急不宜緩亦宜  
重不宜輕故人屬強壯脈沈數有力或沈小而實宜用雙劑加  
大承氣湯大黃樸硝枳實合本方川樸是也能並加羚羊角西  
藏紅花更好一服不下不妨雙劑照加再服以下爲度此係屢  
試必重用方效故特改重重用未見有直瀉者不過大便稍利  
耳亦未見有連來二次者如慮多瀉可備稀粥以待食之即止  
鄭按此證語由大便結故以治大便爲主蓋邪困中焦陽明必實故加大承氣  
以通府氣府氣通則證語自平六證見一皆宜下不比傷寒痞滿燥實堅五者  
俱見方可下也此時危在旦夕下不宜緩不比傷寒下不嫌遲也重用未有瀉  
者吾見亦多矣或下瘀血或下醫糞皆瘵毒外出之兆最爲佳境

搦按舌起芒刺者裡熱熾而胃液涸也急下存陰自是救亡

要策惟原方之柴葛及本方之枳樸俱在可刪可減之例間有不能不用者用時亦須斟酌再樸消係鹵質凝結而成入水即化故用必另沖若不解此法與諸藥同煎便無功效下後熱仍不退痛脹結流四證見一仍宜再下用單劑輕加大黃樸消川樸接服若下熱必退矣

鄭按下後熱不退仍宜再下不可放手惟藥劑改輕接服下後則熱必退藥病相當不必慮傷及胃氣也

壅按下後熱仍不退原非盡由胃實須見腹痛脘脹便結旁流四證之一方爲餘滯未盡之的據

下後仍有微熱閒有譫語加羚羊犀角西藏紅花各一錢日夜二服以熱清爲度貧者可加淡竹葉竹葉心各二錢無熱仍有譫語本方柴葛減半加元參麥冬各二錢淡竹葉竹葉心各一

錢日夜二服可矣

鄭按下後餘熱未盡間有譫語用本方再加羚羊犀角藏紅花以去餘毒

壅按下後有熱而譫語是挾痰而兼挾熱者也下後無熱而譫語是挾虛而兼挾痰者也仲景之溫膽瀉心諸法皆可參用

若大熱大渴兼見痛脹結流四證之一人壯脈實不妨重加白虎承氣同服藥用雙劑以下爲度此表裏雙解法

鄭按外有大熱大渴內則兼見痛脹結流故加白虎挾本方以解表又加承氣挾本方以解裏藥用雙劑重服者以人壯脈實尙堪背城一戰

壅按大熱大渴痛脹結流陽明經府之邪已至極盛陸九芝曰病人可生可死之關即當爲病人求出死入生之路病在陽明之經雖大不大一用芩連膏知即能化大爲小病到陽

明之府不危亦危非用消黃枳櫟不能轉危爲安故當清則清當下則下機會不可錯過

富貴之家懼石膏大黃之多可加羚羊犀角西藏紅花各三錢熊膽一分半竹葉心二錢藥用雙劑連二服如仍熱不退便不下可並加石膏大黃各五錢以下爲度

鄭按此節承上文而言若藥用雙劑加白虎承氣富貴之家必懼而不服不忍坐視其亡故復設一法以救之至熱仍不退便仍不下故並加石膏大黃各五錢以解表裏此時若再疑懼而不服則疾不可爲矣悲夫

據按此條緊接上文而言病危至此惟有白虎承氣表裡雙解尙可得生舍此膏知消黃將何以瀉亢甚之陽而救垂絕之陰乎此時猶豫不下日後雖欲下之晚矣

若至七日仍熱渴不退人屬強壯可重加白虎湯日夜三服以



熱退爲度若見痛脹結流等症人屬強壯可重加大承氣湯一  
二服以下爲度仍有微熱獨見燥結可加增液湯以潤之日夜  
二服仍不下可加小承氣湯大黃五錢川樸枳實各一錢是也  
一服不下不妨再服以下爲度

鄭按症有七日若前失治熱渴加白虎便結加大承氣人屬強壯故加重劑其  
素體虛弱則加輕劑意在外言不可不知惟二證法兼滋陰元參均不可缺蓋  
防熱毒燥陰腎水告竭則更難挽救耳

壅按白虎爲陽明經病不祧之方承氣爲陽明府病不祧之  
方若體壯病重非此不治試問舍此奚有別法

若口燥舌乾齒黑唇焦不甚熱渴脈見虛大本方除柴葛加一  
甲復脈湯本方生地改用大乾生地六錢甘草改用炙草六錢  
赤芍改用白芍六錢餘藥照舊並加麥冬不去心五錢阿膠火

麻仁各三錢是也日夜二服

鄭按溫病條辨一甲復脈湯卽加減復脈湯加牡蠣此節旣加一甲復脈湯何以不用牡蠣且牡蠣爲軟堅化痞益陰退熱妙品似不當去宜補加之

堦按旣見舌乾齒黑何以熱渴反不甚脈反見虛大蓋邪已深入而陰之將亡焉此係壞症良由因循貽誤所致雖救治得法十中僅圖一二而已

液仍不復可並加調胃承氣湯以和之大黃三錢樸硝五錢合本方甘草二錢是也日夜二服以液生爲度

鄭按此承上節而言服前方加一甲復脈湯液仍不復可並加調胃承氣湯以和之

堦按上條但爲眞陰內竭者設法此條兼爲餘滯未盡者設法試以一甲復脈調胃承氣兩方參觀其意自明

若無別證惟核未消餘時不熱獨見子午潮熱本方除柴葛改用大乾生地各藥照舊加元參五錢日夜二服約三四服熱可清矣

鄭按此而爲病後餘邪未解立一治例子午潮熱屬陰虛故加生地元參以養陰清熱

壘按子午潮熱斷不盡屬陰虛如陽明之積熱未盡者亦必潮熱膜原之伏痰未盡者亦必潮熱雖然病後之潮熱固不盡屬陰虛而退熱之藥味皆當叅以養陰也

若夫危急之症初起大熱大渴卽見痛脹急流舌色金黃痰涎壅甚等證人壯脉實藥用雙劑重加白虎承氣並加半夏瓜蒌實黃連日夜二服以病退爲度能加羚羊角犀角西藏紅花各三錢更好凡白虎承氣同用卽取石膏知母大黃樸消可也原

方不必用全

鄭按兩三日間得此至危之證匪特誤用別藥不可卽重劑緩服亦不可然醫家非膽識俱到則不敢用病家非主持能堅亦不敢服故此證誤死者多矣噫填按初病諸症叢生固病之危且急者也故用藥亦須急追直搗應加卽加否則不及挽救矣

若疫盛行時忽手足抽搐不省人事面目周身皆赤此鼠疫之急證非風非脫切忌艾火與參急用大鍼刺兩手足灣處約半分深撚出毒血其人必醒或拈痧或刮痧亦可醒醒後卽照原方連服二三劑若見結核發熱照上法治

鄭按疫氣盛行人在氣交之中感觸猝發多有是證先用鍼法以泄營血必醒或川刮法以宣衛氣亦醒然鍼法失傳已久倘有未諳不可妄施不如用刮法爲便捷法用細磁杯蓋塗茶油順手自上而下先刮肩頸脊背次刮胸前脇肋

次刮兩手灣曲池穴次刮兩足灣委中穴見有紅紫色綻卽止無不霍然而醒凡中暑發痧等證用之亦無不效一俟能知人事按證下藥乃不至悞事耳

壘按疫之急者不但不省人事並有一觸立斃者卽千金之所謂惡注松峯之所謂疫厥也治法一面先從少商穴針去惡血一面速用開竅諸方徐圖救治

老弱幼小急追祇用單劑日夜惟二服加石膏大黃減半所加各藥小兒皆宜減半五六歲一劑同煎分二次服重危之證一劑作一服幼小不能服藥用鍼刺結核三四刺以如意油調經驗塗核散日夜頻塗十餘次亦可愈

鄭按此節爲老幼得病立一治例非漫無分別而喜用重劑也存心仁愛立法精良於斯可見

壘按老年氣衰幼穉質弱雖同一患疫卽用藥各殊就使認

證已確峻猛之藥祇可用至四分之一和平之劑亦不得過十成之五吾願世之安懷在抱者幸毋忽諸

婦女同治惟孕婦加黃芩桑寄生各三錢以安胎初起即宜急服熱甚尤宜急追熱久必墜胎也若疑桃仁紅花墜胎可改用紫草紫背天葵各三錢惟宜下者除樸硝

鄭按鼠疫毒由地起婦人女子靜處室中最易感觸故以本方按證加減同治也惟孕婦以血蔭胎故從方書禁例去桃仁紅花而用紫草紫貝天葵加黃芩桑寄生以安胎絲絲入扣毫不犯手然熱毒久鬱猶易傷胎故初起宜急服熱甚宜急追即內經所謂有故無殞亦無殞也至於宜下之證雖除樸硝然素體虛弱或邪甚正衰胎最易墜即大黃川樸枳實亦須斟酌減輕方不悞事

樵按婦女治法雖同惟顧忌甚多如胎前忌溫產後忌涼崩後忌破經行須防熱入血室孕婦須要安胎此其大較也

諸證皆除惟核未消仍宜服藥瘀去未盡必成瘡也原方除柴葛改用大乾生地六錢甘草改用炙草與當歸俱加倍其餘減半加元參五錢氣虛可加生芪二三錢每日一服三四服核必漸消如消未盡當歸四錢大乾生地元參各六錢翹芍桃仁減三分之一生芪四錢川樸五分炙草三錢再數服或消散或破流黃水愈矣初愈改用原方實滋陰去瘀善後之良方也

鄭按結核未消仍須去瘀病家疑桃仁紅花破血而不敢多服重用瘀鬱釀膿一經破潰轉致成瘡最難收口吾見亦多矣

壘按此條加減諸藥頗中肯綮

人雖虛弱切忌溫補蓋熱證傷陰初愈古法惟滋陰戒溫補況結核未消即熱毒未清溫補助熱其毒必發此時體虛再病必無救矣惟質素虛寒偶感熱毒調治既清復回本質證見虛寒

然後用補亦宜陰陽兩補勿遽溫補峻補貽害也

鄭按此章爲初愈者叮囑告誡竊恐疊補貽害前功盡棄匪特溫補藥劑不可投卽膩補食物亦不可吃此服藥宜滋陰食品宜清淡則無不然愈矣

壘按疫爲淫火疫症初愈不但五液皆被灼傷且府臟皆有餘熱譬之燎原之後餘焰未熄也此時清之不暇何堪溫補或見虛寒脉證亦當陰陽並補所云陰陽之陽猶氣血之氣試觀上條氣虛加芪之法此理自明故陰陽並補卽氣血並養之謂並非眞陽內竭也倘誤投附桂鮮不僨事

愈後六七日不大便腹無所苦乃精液未充用六成湯當歸錢半生地五錢白芍一錢天冬一錢麥冬一錢元參五錢二服大便自易初愈昏昏欲睡手足微冷核消後微有浮腫此由血虛未復氣無所附用補血湯生芪八錢當歸四錢皆宜小心體認



# 切勿倉皇悞事

郎按此條原文倒置未見貫串恐有錯簡且方又另列體例未合故畧爲移易

據按此條卽是氣血兩補法可與上條參觀然既立補法猶恐除毒之或有未盡用者之或有差失小心一語旨哉言乎以上諸法俱從屢次試驗得來證以強壯者爲多故於人屬強壯病盛熱毒家復有餘者每於重危之證必加羚羊角犀角西藏紅花取其見效較捷耳無如人情多儉富者聞而退縮貧者更可知矣茲爲推廣分別熱盛毒盛兩途隨證加藥亦足以治病如初起係熱盛之證加石膏知母淡竹葉或螺螄菜原名雷公根龍膽草白茅根之類便可以清熱如兼有毒盛之證加金銀花牛蒡子人中黃之類便可以解毒若熱毒入心包也羚羊花雖屬緊要即外紅羊犀花然加生竹葉心生燈心黃芩梔子麥冬蓮子

心元參心之類便可除心包之熱毒若熱毒入裏也加大黃樸硝枳殼以瀉之便可去腸胃之熱毒如此則貧者亦費無幾矣老弱幼亦可類推酌減惟要照方按法急服多追方可見效若改輕改緩固屬自悞卽每日一服一二服卽以爲不效何異以杯水救車薪之火卽謂水不勝火也方旣受冤而病者更受冤不誠可痛哉

鄭按此章推廣治法以挽救貧苦之人熱盛者清熱毒盛者解毒入心包則加清宮湯陷腸胃則加承氣湯卽老弱幼小亦可類推酌減於虛立法精良無微不至

壘按富貴者遇石膏大黃則心有所不敢而不服貧苦者遇羚羊犀角則力有所不逮而不服二者不同其自誤則一也故羅氏此條不厭精詳多方設法眞能體貼入微

此證最易反覆有微熱未清而復有微熱方清而復以伏邪未盡也謂之自復查所復何證照方按證加藥以清餘邪自然獲愈有瘥後或因飽食而復或因厚味而復以食物阻滯謂之食復輕則捐穀自愈重則消導方痊加神精山查麥芽以去滯自然獲愈有因梳洗沐浴多言妄動而復謂之勞復脈和證輕靜養可愈脈虛證重調補血氣方愈勿用寒削因服參桂而復急服萊豆山查湯以解之用清補滋潤藥以調之以上各證有核無熱照方酌減服若因怒氣房勞而復最爲費手愈後六七日見脹痛吐瀉等證已非原病宜按脈證調治愈後宜調補猶宜靜養節飲食慎言語謹起居戒惱怒寡嗜慾也 以上彙編

據按疫病之後復病尤易有勞復者有食復者有感冒而復者有餘邪未清而復者有調治失宜而復者復病不一大凡

食復居多語云病從口入詢不誣也其治法尤當量人虛實  
隨症化裁

此證發核有破口潰膿而至腐爛者其故有三一則因初起服  
辛熱之藥如麻桂羌防薑附之屬致熱毒迫瘀成膿二則因初  
愈驟服溫補之藥如參朮炙芪肉桂大棗桂元及雞羊厚味穀  
食粘膩之物餘毒未淨溫補助熱勢必掀腫潰膿三則因病重  
藥輕證急服緩或服解毒活血湯一二劑熱稍退核未消而即  
停藥或去桃仁紅花或更換他方或應加承氣而不服或應加  
白虎而不用藥力未到毒氣逗留亦必酸膿破口迨至潰爛最  
難收口膿水愈流氣血愈傷欲望復元非數十日調治不爲功  
若見熱退身涼脈靜舌淨惟核破口流出黃水須兼內托外用  
泰西黃蠟膏以象皮油華士林調勻貼之即愈他如誤藥誤時

救愈之後核已掀腫色紅而熱按之甚軟已輕釀膿可用銀鍼挑破放出膿水勢將平塌餘瘀未淨先用象皮油華士林調黃蠟膏貼之如不收口再以秦西白蠟膏貼之如瘀膿已淨仍不合口當用珍珠散糝之外貼象皮油須多服活血排膿解毒湯藥或以羅氏原方去柴葛減桃紅加元參赤豆銀花白芷之屬若夫諸證悉平氣血涉虛核腫堅硬既不能消又不化膿毒根不剷終非了局按其脈息細弱內服托裏排膿外敷拙定化核散或用秦西碘礬水時時抹之自化或用生蒲公英搗蜜貼之至於潰膿腐爛體將羸瘦證見虛弱酌服陰陽雙補湯藥以托之若舌苔尚濁口仍見渴是餘毒未盡邪熱未清可進涼血清熱排膿解毒湯藥其外敷藥粉皆以珍珠散調象皮油華士林貼之如膿水將淨肌肉已生惟口未合可單用象皮油即能收

功或用合口膏塗之卽愈約編

壙按鄭氏所補治外諸法簡便適用

刮法

肩頸脊背胸前脇肋兩肘臂兩膝灣等處皆宜用綿紗線或苧麻繩或青錢或磁碗口蘸菜油自上向下刮之以紅紫色綻方止項下及大小腹輭肉處以食鹽研細用手擦之或以指蘸清水撮之景岳云凡毒深病急者非刮背不可以五臟之系咸附於背也

壙按刮以宣之使已入之邪得以外泄而病可鬆也

刺法

第一宜刺少商穴刺時扶病人坐直男左女右用力將其手臂從上捋下捋其惡血聚於指頭以汕頭繩紮住寸口用尖銳銀

鍼在大指甲向裡如韭葉許刺之擠出毒血即鬆重者兩手並刺

兩臂灣名曲池穴兩膝灣名委中穴以手醺溫水拍之露出青筋紅筋若肌膚白嫩者則露紫筋皆痧筋也並用銀針刺出紫黑毒血其腿上大筋不可刺刺亦無毒血反令人心煩腿兩邊鞭筋上筋不可刺刺之恐令人筋弔

壅按以針刺放毒血俾邪得外泄即痧脹玉衡書用砭之意也

附紫草茸辨誤素盦

攷本草綱目紫草釋名紫丹別錄一名紫芙一名茈菰一名藐一名地血一名鴉銜草初無所謂紫草茸者惟李時珍綱目註中曾言其根頭毛白如茸後人因添一茸字以炫人目不謂藥

肆中又以紫草膠代紫草茸而紫草之與紫草茸遂分而爲二以訛傳誤相沿已久殊不知紫草氣味苦寒斑疹痘毒用以活血涼血若一經熬膠不但不能涼血且使熱毒膠粘不能透泄一字之微人之生命係焉吾輩涉筆不可以不慎竊願後之用紫草者幸勿再書茸字 又按紫草一物花紫根紫可染紫色故名紫草膠係燭肆用以染色者並不入藥



鼠疫抉微藥方篇

嘉定素齋余德壩伯陶氏輯

無錫陳麗江校

藥方

鼠疫經驗方 彙編一名加減活血解毒湯

桃仁

八錢去  
皮尖打

紅花

五錢

當歸

一錢五分

川樸

一錢

柴胡

一錢

連翹

三錢

赤芍

三錢

生地

九錢

生艸

一錢

葛根

一錢

羅按此方以桃仁爲君而輔以歸去瘀而通壅翹芍爲臣而兼以地清熱而解毒樸甘爲佐使疎氣而和藥氣行則血通柴葛以解肌退熱而拒邪邪除則病愈惟其對症用藥故能投無不效

又曰此方關鍵全在歸樸一味蓋歸爲血中氣藥樸爲氣中

血藥氣血流通而病安有不愈乎

又釋疑曰此方鍼對病源用藥故能投無不效或疑桃仁紅  
花過多敗血實誤會耳綱目云桃仁補少而攻多紅花合當  
歸能生血多服能行血夫曰補曰生曰行明謂去瘀生新矣  
徐靈胎於桃仁亦曰去舊而不傷新古方多用於傷後產後  
可知二味是去瘀非敗血也又疑當歸助血毒抑知去瘀必  
須活血尤宜生血然用於涼血解毒劑中猶不多用制方者  
未始無斟酌也又疑生地引邪入陰更不可解考之本草經  
謂作湯可除痺去煩熱本草綱目謂能涼血滋陰時醫見有  
陰字遂疑其引邪入陰夫陰血也熱毒中血管邪已在陰故  
內外煩熱四肢痺痛用此正對症良藥而反疑其引邪入陰  
是認滋陰陰字作表裏裏字解矣

壩按方中柴葛羅氏置而未辨豈鼠疫治法重在活血而解肌之藥不妨從畧耶抑故置一隙使人叅用活筆不必拘拘於常格耶雖然病之重者用藥宜重病之輕者用藥宜輕經云過猶不及蓋謂藥與病稱便是良藥故審症用藥果能分別虛實輕重則操縱在我矣

又按孫思邈曰凡用藥皆隨土地所宜徐靈胎曰中州之卑溼山陝之高燥皆宜隨地制宜歧伯有異法方宜論而五常政大論辨高下溫涼之異由來方家所說大畧相同考江南嶺表兩地地形之卑溼雖同而地氣之寒溫迥別是以人之體質亦隨地而異卽藥之分量亦因人而殊羅氏所定之加減活血解毒湯即吳又可所謂急症急攻法也施之於壯體重病誰曰不宜第強弱有相懸陰陽有偏勝或老或幼或其

人本有夙疾或病後元氣未復是在用藥者神而明之變而通之也爰是權其輕重之宜增補加減治法數條

如肝陽素盛者去柴胡葛根加桑葉菊花 肺陰素虛者去柴胡葛根厚樸加桑葉貝母知母 腎陰素虛者減輕柴葛加知母櫛豆 氣分素虛者去柴胡微加防風 血分素虛者去柴胡葛根加桑葉丹皮 幼穉純陽者同 胃熱素重者生地乾者易鮮 痰溼素重者佐以平胃二陳大病之後去柴胡葛根加丹參蘇梗 老年氣衰者同 亡血之後去柴胡葛根桃仁紅花加丹參桑葉側柏白薇 產後血去過多者去桃仁紅花柴胡葛根加荆穗丹參 產後血枯生風者去柴胡葛根桃仁紅花加丹參荆穗天麻櫛豆

吳子存經驗方

大黃 厚朴 枳實 朴消 犀角 羚羊角 川黃連  
黃芩 車前 澤瀉 連翹 牛蒡子 大桃仁 紅花  
紫草 紫花地丁 紫背天葵之類隨病者強弱輕重爲加  
減各味俱宜重用多者以兩計不必遲疑  
原按此證發時熱甚猛速必須急用猛劑不必聽醫師評量  
斟酌揣脈論方延遲片刻遂致難救所謂宋人議得定金兵  
已渡江也依此法治之庶幾百無一失切勿遲疑自誤  
鄭按鼠疫之病熱毒既入血分必以涼血解毒瀉熱爲主初  
起病輕則前承氣羚羊六味可去可減若體強證重非重劑  
急服萬難挽回是在臨證者貴有權宜也

鼠疫毒核消毒散 彙編

銀花 連翹 元參 桔梗 各一兩 殭蚕 板藍根 甘草 各五錢

馬勃<sup>四錢</sup> 牛蒡<sup>六錢</sup> 荊芥穗 薄荷<sup>各三錢</sup>

共爲粗末每服六錢病重入錢以蘆根湯煎藥末二三滾去渣服輕者一日三服重者一時一服

己亥夏惠郡患疫江密莽農部製此散施送賴活者甚衆

鼠疫驗方 同上

大青<sup>三錢</sup> 青黛<sup>二錢</sup> 黃芩<sup>三錢</sup> 花粉<sup>三錢</sup> 人中黃<sup>三錢</sup> 紫草<sup>三錢</sup> 連翹<sup>三錢</sup> 忍

冬<sup>三錢</sup> 梔子<sup>二錢</sup> 水煎服此方屢驗活人多矣

應驗疫證方 同上

紫花地丁<sup>二錢</sup> 紫貝天葵<sup>二錢</sup> 甘草節<sup>二錢</sup> 荊芥穗<sup>二錢</sup> 生大黃<sup>二錢</sup> 穿

山甲<sup>二錢</sup> 牙皂<sup>錢半</sup> 土銀花<sup>三錢</sup> 野菊花<sup>三錢</sup> 西藏紅花<sup>六分</sup> 熊膽<sup>六分食者不用亦可</sup>

用水煎服如有起毒核現紅色者即將紫花地丁紫貝天葵每味加多二錢銀花野菊花每味加多七錢同煎服

治疫奇方 同上

金銀花<sup>三錢</sup> 生甘草<sup>二錢</sup> 小粒烏豆<sup>五錢</sup> 白礬<sup>二錢</sup> 淨黃土<sup>五錢</sup> 右藥五味用飯碗量二碗半水煎至一碗水臨睡時溫服次早天亮計合六個時辰必汗出而愈如不愈次日臨臥時照服一劑無不見效此方無論已傳經未傳經陰證陽證皆愈或用蜜爲小丸每服三錢亦效

經驗塗核散 同上原名經驗塗藥

飛硃砂<sup>五錢</sup> 木鼈仁<sup>八錢</sup> 雄黃<sup>五錢</sup> 莊大黃<sup>五錢</sup> 上冰片<sup>二錢</sup> 眞蟾酥<sup>二錢</sup> 地丁<sup>五錢</sup> 山茨菇<sup>八錢</sup> 右藥共研細末用小磁瓶分貯數十確黃蠟封口俾免洩氣調茶油塗或用清茶亦可 瓊州鮑遊府用此方各味等分調如意油頻塗甚效須先四面輕鍼結核後塗藥凡小孩不能服藥用此法塗甚妙

治鼠疫毒核方同上

初起身熱面紅口渴心悶譫語者決是此證其毒起在頭面四肢及身上初起如豆過兩刻則如龍眼起在皮內按之應手而動急用仙人掌半個切碎煎服如效再以仙人掌舂爛敷毒核留一小孔出毒氣有起核而無身熱口渴者其毒輕先起核而後身熱者亦輕若發熱譫語而後起核者較重核起頭面及上焦者重起四肢及下焦者輕亟宜敷藥藥熱即換見效自速

經驗化核散約編

山慈姑<sub>三錢</sub> 真青黛<sub>二錢</sub> 生黃柏<sub>三錢</sub> 浙貝<sub>三錢</sub> 赤小豆<sub>三錢</sub> 共研細末調麻油塗日塗三四次以消爲度甚見效驗

孫氏塗核經驗方 勞舊旱烟桿內烟油塗核立消



經驗敷核方 彙編

鮮蒲公英<sup>二錢</sup> 鮮柏樹葉<sup>二錢</sup> 鮮浮萍<sup>二錢</sup> 天生子<sup>一錢</sup> 雄黃<sup>一錢</sup> 冰片

<sup>五分</sup> 共舂爛和蜜糖敷之 或梅花點舌丹調煙膏敷之 或

用連鬚蔥頭搗爛加雄黃冰片調敷 或用蛇頂骨一片用

唾津將平底一面塗遍貼核上即粘而不脫一俟脫落用人

乳半杯將蛇頂骨用竹筋夾起浸乳內兩點鐘久吐盡毒氣

毒盛者乳亦變色取出再貼之頻浸頻貼以核消爲度

據按本草吸毒石一名蛇頂骨另詳後考

大承氣湯 仲景

大黃 芒消 厚朴 枳實

小承氣湯 仲景

大黃 厚朴 枳實

調胃承氣湯

仲景

大黃

芒消

甘草

鄒潤安曰柯氏云厚朴倍大黃爲大承氣大黃倍厚朴爲小承氣是承氣者在枳朴應不在大黃矣但調胃承氣湯不用枳朴亦名承氣何也且三承氣湯中有用枳朴者有不用枳朴者有用芒消者有不用芒消者有用甘草者有不用甘草者惟大黃則無不用是承氣之名固當屬之大黃況厚朴三物湯即小承氣湯厚朴分數倍於大黃而命名反不加承氣字猶不可見承氣不在枳朴乎自金元人以順釋承而大黃之功不顯考本經首推大黃通血再以六微旨大論亢則害承乃制之義參之則承氣者非血而何夫氣者血之帥故血隨氣行亦隨氣滯氣滯血不隨之滯者是氣之不足非氣之

有餘惟氣滯併波及於血於是氣以血爲窟宅血以氣爲禦  
侮遂連衡宿食蒸逼津液悉化爲火此時惟大黃能直擣其  
巢傾其窟穴氣之結於血者散則枳朴遂能效其通氣之職  
此大黃所以爲承氣也

白虎湯

知母 石膏

知母

石膏

甘草

粳米

水煎服

柯琴曰陽明邪從熱化故不惡寒而惡熱熱蒸外越故熱汗  
出熱燥胃中故渴欲飲水邪盛而實故脉滑然猶在經故兼  
浮也蓋陽明屬胃外主肌肉雖內外大熱而未實終非苦寒  
之味所宜也石膏辛寒辛能解肌熱寒能勝胃火寒能沉內  
辛能走外此味兩擅內外之能故以爲君知母苦潤苦以瀉  
火潤以滋燥故用爲臣甘草粳米調和於中宮且能土中瀉  
火稼穡作甘寒劑得之緩其寒苦劑得之平其苦使二味爲

佐庶大苦大寒之品無傷損脾胃之慮也煮湯入胃輸脾歸肺水精四布大煩大渴可除矣

涼膈散

方局

一名連翹飲子 連翹 大黃 黃芩 薄荷

甘草 黑山梔 芒消 竹葉 生蜜

汪昂曰此上中二焦瀉實火藥也熱淫於內治以鹹寒佐以甘苦故以連翹黃芩竹葉薄荷散火於上而以大黃芒消之猛利蕩熱於中使上升下行膈而自清矣用甘草生蜜者病在膈甘以緩之也古方用涼膈居多本方加菖蒲遠志名轉舌膏治心經蘊熱加青黛藍根名活命金丹治肝經風熱張潔古減去消黃加桔梗爲之舟楫浮而上行治上焦諸熱便不實者宜之

壘按本方去消黃加桔梗名清心涼膈散治疫邪斑疹最宜

黃連解毒湯

公

黃連

黃柏

黃芩

焦山梔

水煎服

汪昂曰寒極曰陰毒熱極曰陽毒是方名曰黃連解毒是君以黃連直解心經火毒也黃芩瀉肺經火毒黃柏瀉腎經火毒梔子通瀉三焦火毒使諸火毒從膀胱出若大便實者加大黃名梔子金花湯利大便是使火毒從大小二便而出也蓋陽盛則陰衰火盛則水衰故用大苦大寒之藥抑陽而扶陰瀉其亢盛之火而救其欲絕之水也然非實熱之火不可輕投

銀翹散

通物

連翹

銀花

苦桔梗

薄荷

竹葉

生甘草

荊芥穗

淡豆豉

牛蒡子

蘆根湯煎服

原按內經風淫於內治以辛涼佐以苦甘熱淫於內治以鹹寒佐以甘苦之訓又宗喻嘉言芳香逐穢之說無開門揖盜

之弊有輕以去實之能

桑菊飲

上同

光杏仁

連翹

薄荷

桑葉

菊花

苦桔梗

甘草

鮮蘆根

水煎服

原按此辛甘化風辛涼微苦之方也蓋肺爲清虛之臟微苦則降辛涼則平立此方所以避辛溫也

增液湯

上同

元參

麥冬

細生地

水煎服

壅按吳鞠通曰溫病之不大便不出熱結液乾二者之外其熱結之實症則從承氣法矣其半虛半實症則不可混施承氣故以此法代之然陰虛而熱重者生地當易鮮者爲佳

一甲復脉湯

上同

炙甘草

乾地黃

生白芍

麥冬

阿膠

生牡蠣

水煎服

壅按仲景之炙甘草湯一名復脉湯爲千古養陰之祖方凡

病虛而陰陽有虧損者皆可用也吳鞠通從原方去桂枝加白芍名加減復脉湯再去麻仁加牡蠣名一甲復脉湯乃專爲溫病救陰而設用者不可不知

清宮湯

上同

元參心

蓮子心

竹葉心

連翹心

犀角尖

煎中

連心

麥冬

水煎服

原按此鹹寒甘苦法清臚中之方也

清營湯

上同

犀角

生地

元參

竹葉心

麥冬

丹參

黃連

銀花

連翹

水煎服

據按此方從犀角地黄湯加入輕清逐穢之品亦鹹寒苦甘法也

犀角地黄湯

仲林

犀角

所中

連翹

生地

生甘草

水煎服

王晉三曰溫熱入絡舌絳煩熱八九日不解醫反治經寒之

神犀丹

溫熱論

散之攻之熱勢益熾得此湯立效者非解陽明熱邪解心經之絡熱也按本草犀角地黃能走心經專解營熱連翹入心散客熱甘草入心和絡血以治溫熱證熱邪入絡功勝局方

真犀角

磨汁

石菖蒲

黃芩

各六兩

生地黃

冷水洗淨浸透切絞汁

銀花

各一觔如有鮮者切汁用尤良

糞

清

香連翹

各十兩

板藍根

九兩無則以飛淨燕窩代之

淡香豉

八兩

大元參

七兩

天花粉

紫草

各四兩

右藥各生晒研細

忌用火炒

以犀角地黃汁糞清和搗為丸

切勿加蜜如難丸可將香豉煮

每重三錢涼開水化服日二次小兒減半如無糞清或用

金汁水或加人中黃四兩研入俱可

王孟英云溫熱暑疫諸病邪不即解耗液傷營逆傳內陷癰厥昏狂譫語發斑等證但看病人舌色乾光或紫絳或圓硬



或黑苔皆以此丹救之若初病即覺神情昏躁而舌赤口乾者是溫暑直入營分酷暑之時陰虛之體及新產婦人患此最多急須用此多可挽回切勿拘泥日數誤投別藥以僨事也兼治痘毒重夾帶紫斑危證暨痘疹後餘毒內熾口糜咽腐目赤神煩諸證

普濟消毒飲 東垣

黃芩 黃連 連翹 薄荷 桔梗 牛蒡 馬勃 板藍根 元參 僵蚕 升麻 柴胡 陳皮 人參 灸甘草  
便秘加大黃煎湯飲

原按金泰和間多有病大頭天行者醫以承氣下之不愈余曰身半以上天之氣也身半以下地之氣也今邪熱客於心肺之間而以承氣瀉其胃熱是爲誅伐無過病以適至其所

爲故因處此方全活甚衆遂名普濟

達原飲 吳又可

檳榔

二錢

厚朴

一錢

草薢仁

五分

知母

一錢

芍藥

一錢

黃芩

一錢

甘草

五分

煎溫服

原按檳榔能消能磨除伏邪爲疎利之藥又除嶺南瘴氣厚朴破戾氣所結草薢辛烈氣雄除伏邪盤踞三味協力直達其巢穴使邪氣潰敗速離其膜原是以爲達原也熱傷津液加知母以滋陰熱傷營氣加白芍以和血黃芩清燥熱之餘甘草爲和中之用以後四味不過調和之劑如渴與飲非拔病之藥也

菊花甘草湯

程鍾齡

甘菊花

四兩

生甘草

四錢

水煎頓服渣煎再服

千金雄黃散 塗五心額鼻人中及耳門能避瘟氣

雄黃<sub>五兩</sub> 硃砂<sub>二兩</sub> 九節菖蒲<sub>二兩</sub> 鬼臼<sub>二兩</sub>

右藥研末過篩磁礮收貯每用錢許調井水塗

千金太乙流金散 辟瘟氣方若逢大疫之年或用三角絳袋

盛掛心前或懸戶上或焚中庭或燒薰瘟病之人無不靈驗

雄黃<sub>二兩</sub> 雌黃<sub>二兩</sub> 礬石<sub>兩半</sub> 鬼箭羽<sub>兩半</sub> 煨羚羊<sub>二兩</sub> 右五味研末

過篩磁礮收貯

千金斷瘟方 瘟疫轉相染着至滅門延及外人無收視者服

此一丸可與病人同床不至傳染

赤小豆 鬼箭羽 鬼臼 雄黃

右四味各等分研末過篩以蜜杵丸如小豆大磁礮收貯

壚按外臺秘要多硃砂一味

治疔瘡方 吳本

鮮白菊花連根無花用葉打自然汁一杯熱酒沖服或開水沖服渣敷患處留出瘡頭蓋被出汗其毒自解

八寶散 約編

治瘡毒膿盡用此糝上即能生肌長肉平口收功效驗異常

珍珠

一錢人乳浸三日或裝豆腐中煮透取出研細如飛麝

真血竭

五分

粉口兒茶

五分

煨石膏

二錢

鱸甘

石

一錢以黃連五分煎汁研碎細水飛淨

赤石脂

一錢

陳年吐絲頭

五分

梅花冰片

二分

辟疫良法 同上

用硫磺銀硃二味等分不可以新瓦燒藥放在房內關閉窗戶

薰之可除疫氣及死鼠氣味

又法 用貫衆一兩條白礬一兩烏豆一撮同放水缸內白礬

烏豆宜用夏布小袋裝貯放缸內三四日取出一換

選用萬國藥方同上

臭水卽辟瘟解毒藥水每日以此沖洒地角陰溝卑溼等處  
一二次可除一切疫癘穢氣

臭丸卽白樟腦丸亦名辟疫丹佩帶身上可辟疫癘

白蠟膏 黃蠟膏 俱生肌潤燥

松香油膏口唇 象皮膏 俱收口生肌

碘礬水一名海碘洗水外搽癰癰結核及大頭瘟核瘟

華士林 潤肌滋燥

附吸毒石考素盞

陳士鐸石室秘錄曰瘡毒初起有一種解毒之石卽吸住不下  
但毒輕者一吸卽下毒重者必吸數日始下不可急性而人自  
取下也此石最妙一石可用三年然止可用以治小瘡口耳大

毒癰疽仍須煎湯藥治之爲妙

王遜藥性纂要曰近見有吸毒石云出西洋放毒上卽吸緊不能動拔出毒氣力盡則自脫

吳震芳嶺南雜記曰吸毒石乃西洋島中毒蛇腦中石也大如扁豆能吸一切腫毒卽發背可治今貨者乃土人捕此蛇以土和肉舂成大團棋子可吸平常腫毒及蜈蚣蛇蝎等傷置患處粘吸不動毒盡自落其石即以人乳浸之變綠色急遠棄之著人畜亦毒也不用乳浸石卽裂矣一石可用數次真惱石置蛇頭不動爲驗

王丹麓石友贊曰嶺南方物紀吸毒石出西洋色與滋石相類凡身有腫毒或受蟲蝎毒處置石其上毒盡收石內其患卽平隨以石浸水中一晝夜出毒便可再用不窮贊云

原缺

人有疾患 苦莫可告 我切恫癘 無方以療

石本西洋 力兼衆妙 能收能出 循環愈效

袁慢恬書隱叢說曰吳江某姓有吸毒石形如雲南黑棋子有大腫毒者以石觸之即膠粘不脫毒重者一週時則落毒輕者逾時即落當俟其自脫不可強離也強離則毒終未盡焉俟其落時預備人乳一大碗分貯小碗以石投乳中乃百沸踴躍再易乳復投更沸如是屢次俟沸定則其石無恙以所吸之毒爲乳所洗盡也不然其石必粉裂矣云得之于舊家本出于大西洋中傳記不見乃知世間奇物不可以理測也

紀昀灤陽消夏錄曰左傳言深山大澤寔生龍蛇小奴玉保烏魯木齊流人子也初隸特納格爾軍也嘗入谷追亡羊見大蛇巨如柱盤於高岡之頂向日晒鱗周身五色爛然如堆錦繡頂



一角長尺許有羣雉飛過張口吸之相距四五尺皆翩然而落如矢投壺心知羊爲所吞矣乘其未見循澗逃歸恐怖幾失魂魄軍吏鄢圖麟因言此蛇至毒而其角能解毒卽所謂吸毒石也見此蛇者携雄黃數斤于上風燒之卽委頓不能動取其角鋸爲塊癰疽初起時以一塊著瘡頂卽如磁吸鐵相粘不可脫待毒氣吸出乃自落置人乳中浸出其毒仍可再用毒輕者乳變綠稍重者變青黯極重者變黑紫乳變黑紫者吸四五次乃可盡餘一二次愈矣余記從兄懋園家有吸毒石治癰疽頗驗其質非木非石至是乃知爲蛇角矣

鼠疫抉微醫案篇

嘉定素盦余德壘伯陶氏輯  
無錫陳麗江校

醫案

羅芝園醫案

辛卯春縣城疫作初閱得醫林改錯活血解毒湯贊與證合爾時黃木生爲予薙髮卽求鈔用予囑初起卽用定易見功及後詢之知伊家救此證者五人皆一劑愈其時林子幹在座伊村初疫鈔治三人亦一劑愈一工人持藥回家延醫診視醫者憤憤教服半劑竟斃

癸巳春城鄉皆疫予回橫山泰興當早飯李子碧林至云有二婢大熱譫語腿核如卵是早長者已死次者現危求錄此方照

鼠疫

抉微

醫案篇

方加羚羊角犀角各叁錢初服小便如血熱減核小然腹滿便結熱毒傳裏復加枳實壹錢樸硝貳錢大黃伍錢同渣煎服是晚下二次次早全愈何氏婦橫山人與婢同病其子聞婢已愈亦來求方以其貧教以連服三劑之法次日熱退惟核未消卽行止藥後成瘡潰爛

石城宏豐號蘇杭店主人梅仿生龍山人也店內陞劉二司事患此證服時醫藥瀕於危壯熱譫語二日矣予由橫山回城仿生告以故予因言此方之效衆皆疑而置之次早延醫不至不得已用之仿生見紅花枯索加西藏紅花貳錢一服病退再服熱除核消三服全愈此加西藏紅花之始也二司事愈後恨時醫之誤信此方之神故刻陳情辨惑說傳之陀村用合劑法傳至縣李碧林亦寄信至縣此方之效一時聞傳信者遂衆焉

族弟讓階之子在外染病回熱憎大渴痛痺自頂至踵起核卅餘顆危證也族人共酌曰如此危證非輕劑可挽遂合二劑爲一劑加石膏一兩羚羊犀角各三錢一服熱退渴止仍合劑服熱除核消單劑再服四五劑全愈可知危證責效一二劑必無望矣

安鋪廩生李蔭棠之姪年十四歲患此證甚危熱憎顛狂牙關緊閉皆謂不救蔭棠聞此方之效即催其父母照方加羚羊犀角西藏紅花各二錢取四劑回搗而灌之吞下即吐頻頻灌之始不吐連盡四劑病減再服數劑而愈惟誤聽時醫之言減去當歸其核不消而潰

許旺宜興棧夥計卅年十五骨氣正壯初患此證壯熱頭痛無核危證也教以連服之法二劑熱退次早煮粥熱服遂微熱譫

語四肢痺痛急加羚羊犀角各二錢西藏紅花一錢一服痛如故兼見胸腹滿痛急用下法一服仍如故並聞藥欲吐一老醫曰此熱毒攻胃也教先服淡竹茹湯然後服藥果不吐再照方加下藥一服病稍退仍加羚羊犀角各二錢連二服並服生燈草心螺螄菜龍膽草白茅根白蓮葉等藥兼葦湯數次始愈黎涵智白藤山人也在石嶺貿易每好談醫得此方常錄以治人囑曰切不可減少桃仁紅花及已與妻患此證反疑曰我夫妻年六十餘矣恐不能受此重藥遂改輕桃仁紅花二劑即斃妻亦垂危人閱所開之方始知改輕即照原方開服其妻得不死

乙未陀村治案

次兒啟基年及壯三月初二晚飲酒後壯熱頭痛口渴身痺左

腿腫連二核照方一服次三四日照方加西藏紅花錢半二服未效初四下午予由城回熱槽之甚急用雙劑連追加石膏一兩知母五錢羚羊西藏紅花各二錢犀角三錢三服仍未效雞鳴後譫語頻流尿汁毒入臟矣初五早照前加樸硝二錢大黃三錢連二服已無尿汁頭痛亦順惟壯熱未退心胸煩燥大便轉閉初六仍照前石膏知母減三分之一歸減半另加犀角一錢生竹葉心生燈心各一撮生梔子淡豆豉各三錢大黃加至五錢連二服熱稍減便仍未通及晚照前大黃加至七錢一服便通熱始退譫語仍未盡除初七八九用單劑加羚羊犀各二錢西藏紅花一錢竹葉心燈心爲引每日二服微熱譫語始清獨核不消堅硬徑寸而痛以後照方日一服六七日堅硬已軟小成瘡以痛未止仍日一服又三四日始穿流黃水用托裏透膿

湯二服瘡已成膿而頸起微核復照原方二服核消仍塗敷數日始愈此證初熱邪在表失在不重加白虎迨已入臟又失在輕用承氣以致於甚其核不散又失在減輕當歸誠以大熱不退時感於常說慮當歸助血熱大黃損元氣故耳所幸誤用輕而不誤用藥不致大誤自後遇證宜用石膏大黃人又強壯者初用必七錢次用一兩多於二三服見效

一後生年十七初熱渴痛痺見核數處依方二日三服已熱懣矣次用雙劑加知母五錢石膏一兩羚羊犀角西藏紅花各三錢一服稍效主人慮白虎大寒羚羊太貴用雙劑加西藏紅花二錢二服隨用單劑二服甚至譫語奄奄一息移至廳事備棺將殮矣家人遷避留人看視原方日一服二日後有老婦來告曰此子稍蘇呼救能食米湯予細詢之知尙微熱譫語並手擺

舞大便閉結已形銷骨立矣姑予二劑加羚羊犀各二錢西藏紅

花一錢樸硝三錢大黃七錢連二服未通已能食稀粥一碗

注鄭

此證弱邪衰故食粥無碍

再用雙劑加羚羊犀角西藏紅花各二錢樸硝四錢

大黃一兩一服即通諸證皆減惟核潰爛調治廿餘日愈此證雖誤時幸無誤藥卒能保全然以遲疑致苦累已不少矣

一少婦臟寒時服溫藥初起壯熱頭痛大渴身痺頸核焮紅隨時加腫急用雙劑連追加知母五錢石膏兩半至二兩羚羊犀角西藏紅花各三錢日夕四服腫已定痛渴稍順惟熱未退以大便未通故也次早仍用雙劑加知母四錢石膏一兩樸硝五錢大黃一兩羚羊犀角西藏紅花如故一服未通日中照前大黃加至兩二便通滯下熱稍減晚仍照服以後用單劑加羚羊犀角西藏紅花各二錢日夜二服五六服全愈此證加藥至



重追藥至急其愈亦至速

丙申瓊府治案

黃聖徵年將五十海口會隆行股東也家瓊城以疫死者已四人伊始病避居海口延往診視其證稍熱渴腿夾各一核足而一疔瘡毒甚而熱不甚也輕加石膏知母並紫花地丁囑日夜三服並外塗伊答云敢二服亦聽之次日畏石膏之寒不得已加羚羊角犀角西藏紅花各一錢並紫花地丁囑二服是晚稍見譫語加羚羊角三味各錢半並地丁竹葉心囑二服次早譫語已無除竹葉心照上加法連服數日皆囑二服至六七日瘡下熱靖而人弱矣初愈照初改原方法囑每日二服五六服疔潰腐脫核亦漸小再照次改原方法治俱見上條加生芪三錢每日一服四五服始稍精神核穿出黃水疔瘡愈而足微腫再照次

改法加芪閒服補血湯又數服始愈愈後始知以家人阻止初二日止服劑半以後每日止一服噫以緩服而至久延倘非年將弱而熱未甚必悞事矣

海口潮行公成號楊子敬長孫十歲身熱無核右脈盛左疫證也原方減三之二加竹葉銀花囑日二服伊日一服三服後兩腿見核加西藏紅花二服證見熱結旁流核愈大原方全劑加黃樸減半一服下後腹微痛又加黃樸酌減服後腹仍痛再加酌減一服病愈而核未消照改方三服核消無痕伊次子年二十餘歲熱渴痛痺有汗無核危證也宜重加白虎主人懼寒減半日夜三服病如故次日迫改加羚羊花各錢半三服仍如故第三日三味加至二錢二服是晚主人持別醫之方來商予謂其方重用清解之藥無礙但無桃紅恐不中肯耳二服如故稍

見譚語第五日復求治加三味至二錢半是晚下毒瘀如煙膏但微熱而已第六日照第二日方日夜二服復下瘀一次諸病皆除惟昏昏迷睡手足微冷主人著急診其脈已見和緩知其爲困也著備稀粥以待將晚醒稍精神復照一服第七日兩手臂始見微核數粒以後照初改方日一服五六日不大便服六成湯一服卽順以後照次改方閒日一服數服愈

一婢微熱痛痺無核初輕加白虎二服再少加西藏紅花二服愈

一工人微熱有核原方四五劑愈

海口貞記號有工人邱姓文昌人年廿餘雞鳴起病黎明大熱渴痛痺有汗無核已不省人事矣爲至危證重加白虎日夜三服次日熱稍退伊戚慮寒予笑謂仍宜重用迫順其意用五錢

又三服第三早熱稍增始信前言不誣用七錢加犀角西藏紅花一錢又三服卽咳出瘀血數塊而愈此以重用急追見效之速也

府城西門外下田村有黃姓夫婦齊來求治伊子細詢其狀曰兒名亞就年十歲形瘠弱現已熱渴譫語周身數十核予訝其多曰初腿夾二核身微熱第四日醫以爲虛用花旗參二錢遂致如此此加羚羊花證也伊謂貧難辦此贈以衆備西藏紅花三錢初用全劑即小兒雙服法加元參心連心麥冬竹葉心各二錢西藏紅花八分日夜二服病已減半繼用原方三之二加藥減四之一二服病已十去八九惟雞鳴時微有熱渴譫語此潮熱陰虛也用初改原方法加重大乾地並元參五錢二服病愈後知其足面一疔瘡用次改原方法加紫花地丁三錢數服

並外塗始痊其餘治效甚多難備錄

廉雷醫案

乙未四刻初成即過瓊候委有孔姓來瓊交五十本帶回廉州分送丙申二月孔姓復來瓊詢之知漢軍薛蓉裳孝廉歎賞此方廉城內外現有此證皆用此方敢照法者無不效及四月接孝廉三月十五寄瓊索書之信云廉城自正月至三月染證二百餘人惟十餘人不敢服致誤刻下各鄉亦有此證來城取書已無以應特求多寄以便廣傳按此則廉之治效亦多也雷州遂溪平石村初得此方亦效雷廉亦皆有徵也此方他鄉用之十愈八九惟我陀村著效極多以用法有善不善之分猶在服藥有急與緩多與少之別也統計見效之處石城以陀村石嶺一方爲最城內安鋪及各鄉次之化州以新安一方爲最州城

及各鄉次之廉府以城廂內外爲最山口北海及各鄉次之瓊  
府以海口爲最海田及府城次之雷府以平石爲最城月及各  
鄉又次之救人不知凡幾矣省城西關衆善士將第二次藏高  
郡聯經堂刻本刊發欽州李直刺將第三次藏省垣聖經堂增  
本刊發海口衆善士將第四次藏高郡聯經堂增本刊發印送  
已多流傳亦遠方到之處苟無蠱惑遲疑即敢急追多服勿以  
小愈而中止必以全愈爲收功庶幾有濟耳夫鼠疫死證也此  
方生方也以必死之證而不敢一用可生之方吾固惑矣以必  
死之證而不敢盡用可生之方吾愈感矣

有一二服未效而藥益者  
有數服稍效亦藥益者

衆曰氣數吾亦曰氣數而已矣夫復何言

石嶺一劉姓中疫甚危手足腹背六處起核氣喘如牛熱甚渴  
甚一人告以雙劑連服法每雙劑加石膏一兩知母五錢羚羊

犀角西藏紅花各二錢大罐共煎隨渴隨飲連進二服已奄奄一息矣三更後大下毒瘀而甦再用單劑熱清核潰而愈

### 李雨山醫案

丁酉夏五漢珍家兄紹符患安其時適該縣城鄉患疫醫生處方皆不對證死者日以十數人計余聞之戚戚焉復以加減解毒活血湯方刊刷廣送遍貼城鄉并製藥施送邑人賴活者甚衆己亥四月余郡惠州城亦染是症當鼠疫初作時余有聘媳何氏年十齡患此證余深知此方之驗商之瑞雲親家擬以此方與服之醫者疑桃仁紅花過重狃於偏執避而不用又悞抽搦爲內風惠俗有女醫者專醫小兒科故偶爲風而失以宜灸之以艾越宿已不治矣六月間有堂弟年廿五自外鄉染病回昏悶痺痛起核數顆屢投清涼劑未能見效越二日熱憤顛狂牙關緊閉僉謂不救余以此

方加劑合煎攝而灌之連服八劑而愈蓋吾鄉初染是證時病家多悞聽時醫之言以此方過重而不敢用以至病者十不救二纔四閱月計歿者千一百有奇遂至醫生束手病者委命而已傷心慘目何以爲情余遂集同人捐貲備藥施送後之病者服此輒痊於是郡縣各鄉始堅信此方之效驗即醫生亦佩服而不疑矣藉此方活者二三千人近年廣東省城香港澳門各處服此方活者亦億萬衆余去臘游幕南安適館時正值城鄉患疫余抄錄各方遍貼城鄉聞服者甚效今秋于役溪尾有鄰居六歲小孩染疫起核余贈以此方兩服即愈足見此方之效又奚止吾粵一省已哉

庚子秋  
口誌

### 劉蔚立醫案

什湖鄉劉求與妻年五十餘歲由台江傳染獲病而歸其證陽



熱大甚忽而惡寒脈盛神昏面赤肌熱目視燭光如黑且有譫語下洩核猶未見遂擬大柴胡原方大黃用三錢加銀翹地丁等一下而惡寒罷腿旁核現次日即用解毒活血湯加極重白虎並解毒各藥令其日夜二服服過二三日諸病減半惟痰涎凝結如卵塞在喉嚨不上不下復來延診仍疏原方更加芒硝二錢大黃三錢下後而痰涎乃降後去硝黃二味如前常服約計六日服至十三劑全愈而腿核亦潰因原書經驗塗核散隔江路僻製取不易乃以精製膏藥三四帖貼之此核亦消二甲鄉劉爲楚有媳婦懷孕七八個月亦患此證初起核結腿縫尙未見寒熱余曰此人明日必發熱惡寒神昏欲睡後果應余言卽來延診先以解毒活血湯原方加黃芩葡萄乾等以保其胎而又恐桃紅二味有碍於胎服後三四點鐘卽將此方去

桃紅加紫草紫貝天葵又投一劑諸病皆瘥適六月初一日洪水滔天藥停一日病又復作彼則紫木簾而來商仍以前方去桃紅令日夜二服服過二日全愈卽以祕製膏藥數帖與之其核不期消而消矣

一族叔陰庭素業儒嬌患此證初起微惡寒腿旁結一小核卽延鄰鄉儒醫來診服秦艽鼈甲散惡寒罷頭汗出熱猶不解繼卽服升麻葛根加銀翹淡竹自朝至暮舌強不轉腿核愈大乃延余診治急疏本方加白虎及銀花地丁之屬次晨大瘥午後復起繼卽項強背反手足不舒而又發微笑不省人事其證隨起隨重藥亦隨起隨加加至調胃承氣二劑桃仁承氣一劑中間一劑大黃用五錢芒硝用三錢病勢漸減此後用雙劑連追法日夜三劑每劑加石膏二兩知母八錢餘藥數品每日夜服

藥舂餘服過五六日勢退去柴葛又服三四日後改用竹葉石膏湯去人參加元參丹參萐貝等以收全功惟核未收口亦敷精製膏藥數帖而愈同時蔭庭叔之母年近古稀素有哮喘證因媳婦抱病不免勞苦哮喘復作其證但熱不寒神昏嗜臥目不欲開口不思食而又無核余思無非此氣所染而成遂以原方加竹枳萐貝一劑而平次日復發連服二劑而愈此感疫無核之明徵也足見解毒活血湯神效異常

堂嫂亦患此病其證上吐下瀉發熱惡寒一身痛楚核結腿旁湯藥入口卽吐余急用竹茹三錢煎湯先服繼服藥而又吐隨服生薑汁少許後始不吐余思惡寒未罷尙未盡化熱用解毒活血原方絕不加減一味一服而吐瀉止連服三四劑諸病皆平核用生草和鹽飴攤貼日久始消

舍弟婦頸旁素有瘰癧是日午前無恙午後忽起寒熱神昏欲  
睡目不欲聞而頸旁纍纍有三核始猶疑其瘰癧本證也細按  
一核如光餅大始悟核證而非癰證即用解毒活血湯原方加  
夏枯草蒲公英蘇銀花等日夜兩服連服二劑全愈後祇用夏  
枯草蒲公英銀花三味日二服外貼精製膏藥二帖全消同時  
大舍姪年十四寒熱往來面赤核結左腕隔十餘日二舍姪亦  
復如是核結喉上皆用原方一劑而奏功

鄭肖巖醫案

下渡王姓今夏五月間右胯纏結核疼痛人煩頭疼睛紅口渴  
舌黃濁惡寒壯熱予疏解毒活血湯二劑寒熱能而面項斑現  
色紅粒稀神識尙清再以原方去柴葛加犀角竹葉銀花牛蒡  
金汁水二劑並服葉氏神犀丹數粒斑透身涼脈尙滑大大便

數日未下再以前方加生大黃五錢二劑始下黑糞數次舌胎  
轉淨人甚煩渴仍以前方減桃仁紅花加石膏知母竹葉心元  
參紫地丁紫草紫背天葵之屬疊進數劑病去八九核亦不痛  
惟頭上發小瘡癰其熱氣如蒸飯右眼睛色紅如硃改用涼膈  
散去硝黃用竹葉心加羚羊丹皮赤芍鮮地黃元參數劑其火  
始降面不赤而睛不紅此君素嗜酒濕熱久鬱又感時疫故病  
重勢猛非病家信任一手醫治萬難挽回抱病十餘天粥飯米  
泔戒不入口只食菜豆薏米番薯肌肉並不瘦脫靜養數天即  
能健步出門矣

塔亭郭厝裏有邁婦陳氏於五月半後坐轎來診人難支持神  
有欲昏之狀頭痛肌熱微惡風舌胎極濁口作渴時有嘔逆診  
其脈滑急而右三部較盛予曰近日貴鄉塔亭一帶有鼠疫起

此證當是感疫初發雖未見核然腿邊痛痺不可不防急疏葱  
豉銀翹紫草滑朴蘆根絲瓜絡黑豆芽之屬翌日來診神清寒  
罷頭痛減嘔逆平餘證均在右胯縫乃現一核即以解毒活血  
湯去柴胡加竹葉銀花紫草外用塗核散頻塗此婦去後有座  
客云此人與予鄰右其子感疫初亡殊爲惻然第三日來診熱  
退頭不痛舌胎漸退大便秘結急以原方去柴葛加生大黃三  
錢是夜下醬糞數次瘀行絡通諸證均瘥舌胎退淨人見煩渴  
第四日再以原方去柴葛加白虎因年老婦人再減桃仁紅花  
加紫地丁紫草與之病去有九其核不痛反見紅腫予疏銀翹  
車前草馬齒莧菉豆之屬并以手定化核散用生蜜調塗二三  
日其核即消此婦亦十餘天只食菉豆薏米番薯并不傷脾胃  
霍然而愈

塔亭觀音佛衛京茶庄司賬方姓今夏六月初晨起見頭痛發熱口渴胸悶舌苔黃濁即來請診午後赴視人已神昏身僵不能轉側其東人云昨夕飲酒啖荔今早始病診其脈則右較洪大有力予曰此感疫證也恐有發核耳令棧夥捫索左胯邊核大如李外用經驗塗核藥粉急疏解毒活血湯因無惡寒去柴胡加竹葉銀花翌日覆診渠能起坐自述病情視其手有斑點令脫衣細驗上半身皆有紅斑再以前方加犀角牛蒡元參及西藏紅花二錢金汁水三錢後沖第三日赴診斑透身涼脈轉緩再以前法去柴葛加減與之並佐葉氏神犀丹數粒代茶病去有八渠不喜服藥竟停三天不來延診後再赴診左喉邊結腫甚大幸喉裏不痛予改用普濟消毒飲去升柴加浙貝牡蠣元參銀花天葵之屬數劑外塗手定化核散結腫消過半胯邊

核破出黃水甚多孰料腋下又發一核幸不甚痛足見停藥誤事致餘毒走竄再以解毒活血湯去柴葛桃仁用五錢紅花用三錢加地丁車前浙貝之屬渠連服六劑諸核均消即能搗管司賬料理生意

辛丑九月江邊鄉鼠疫起予即分贈此書信者絕少其氛愈熾有某君之妾領下發核寒熱並見脈則右盛於左睛微紅喉微痛身帶痺先延劉君可藩進普濟消毒飲大意無甚見效余因發在上部亦繼進是方畧爲加減亦不能應手改用活血解毒湯囑其日夜三服寒熱即罷神識清爽核尙腫痛外用塗核散頻搽後因煩渴或加白虎熱結腹脹或加承氣予與劉君信守是書方法前後服桃仁紅花各數兩藏紅花兩餘十數日即奏奇功其妾方愈其女復感疫證較重核發脰縫連服三劑寒熱



即罷桃信逾期亦至最爲吉兆且所下多瘀血熱毒遂得外洩  
惟營陰被燦繼復發斑用原方加犀角白虎及金汁水冲服且  
經水已來疊服桃仁紅花其絡下黃水反止並不傷新血計前  
後亦服桃仁紅花各數兩藏紅花亦有兩餘皆能易危爲安  
后洋裏牛肉衝內有習錢業某君於四月閒得疫證斑核並見  
又因誤藥神督譚語於昏亂中忽呼家人曰速延中洲鄭先生  
來治因昔年其母病重係予救治得愈渠偶憶及其戚即來請  
診譚言發核按其脈沈數不省人事家又清貧無力服犀角更  
形棘手急疏涼膈散加元參牛蒡紫草紫地丁冲金汁水並佐  
葉天士神犀丹囑其連服二劑是晚服一劑證不減翌晨始再  
服一劑又服神犀丹一粒午後下醬糞數次神識清爽肌熱悉  
退舌苔亦淨繼以前方去硝黃加元參生地銀花地丁之屬病

愈有八核腫甚大腿後腫如黃瓜色帶紫按之甚軟囑其速針潰去膿水兩大碗胯縫之核漸消後以涼解收功其時未得鼠疫彙編然葉氏神犀丹中有犀角生地元參銀翹紫草冀清等味皆活血行瘀解毒清熱之品與是書活血解毒之意若合符節同時鹽倉前又用此法復救兩人附識於此足見下焦發核邪結厥陰血絡非活血行瘀升邪解毒萬難大奏奇功

興記司賬高君陳豫九副貢之表弟也得疫核證豫九兄是夜已投解毒活血湯一劑翌晨來延診治予按其脈弦滑素有木火手筋見惕即以原方加羚羊藏紅花無惡寒只發熱去柴胡加淡竹葉銀花囑其連服二劑翌日神清筋舒熱退再以原方去柴葛加藏紅花紫貝天葵之屬與之渠因溪流阻路三日連服八劑計前後共服桃仁七八兩紅花四五兩其病霍然並未

見有點新血脫下此方真不可思議彼未敢放膽信用者皆識見不到故誤人多矣

辛丑夏閒省城鼠疫大作延及南關外各鄉村余得是書即印數十本分贈同道諸公奈信從者少維時將此書指授欽兒依方按法在鄉施治因旁言蠱惑病家多不敢服甚至有誤服熱藥而死者有誤用針刺而死者有信女巫及降僮而死者死仍不悟殊堪悲惻閒有數家信任而得生者爰命欽兒畧敘治案於下以備徵信爲活人計或不無少補云

時聚族叔家中連日鼠死十數尾余囑其速用雄黃蒼朮鬼箭等藥於室隅牀下焚而薰之數日其婦兩腿上結核二粒神識忽清忽昧肌微熱口微渴四肢痺痛湯藥入口即吐此熱毒攻胃也疏鮮竹茹一兩煎湯先服服後再照原方去柴葛加梔豉

竹茹二劑吐止神稍清熱漸退惟肢痺核未消再以原方重加歸芍桃仁日服二劑連服數日而愈伊姪年十三左脇下同時發核外證相似亦照原方加減服四五劑應手而痊

則福從姪同居患鼠疫者五人因誤藥誤時皆至不救渠業農操勞太過早起頭痛惡寒後即熱渴左腿上結有小核誤服辛溫發散之劑卽神昏譫語肌熱烙手舌濁口渴四肢痠痛核亦紅腫而大其第來延診視初用原方解毒活血湯加消腫化毒之品不瘥次早舌濁轉絳筋惕洩赤大便下利糞汁此熱結旁流血絡凝瘀所致又以本方去柴葛加石膏知母竹葉羚羊犀角大黃樸硝重用桃仁紅花三劑後大下黑糞數次神識轉清熱亦漸退惟核未消外用塗核散內服原方加減或單用涼解之劑廿餘日核潰黃水流盡而愈

其春族兄次子則聚年二十八歲素屬陰虛體質羸瘦午飯後忽覺頭疼壯熱心煩口渴肢痺胯縫發核如卵初用本方加梔豉先服一劑不瘥且譫語昏狂渴欲飲水又以本方加石膏知母竹葉犀角服二劑次早大便秘下糞水余曰此熱結旁流也照前方再加大黃樸硝餅車前草服三劑是晚大下黑糞數次神識稍清肌熱漸退渠兄弟疑服涼藥過多尅伐中土養米粥半碗與食食後約三四點鐘諸病復作此食復也余聞之急用前方重加硝黃連服三劑病始漸退可見疫證最忌穀食後每日仍食菜豆番薯十餘日餘熱退盡核亦漸消方敢少進稀粥潘阿波興化人寄居敝鄉素在貨船爲夥勞苦之極且多感受海風潮濕數日前已覺精神不爽前晚歸家有夢遺黎明即頭痛寒熱惡上結核片刻腫痛而大診其脈浮弦帶滑神識忽清

忽昧舌濁而潤口渴不喜飲遍身痺痛小洩短赤此客感時疫  
絡脈凝滯與少陰夾寒證有別初用葱豉加桃紅銀翹歸芍服  
後汗透神清熱亦漸退繼以原方去柴葛加鮮車前草服二劑  
大便下黑糞數次核亦不痛而愈十餘日後核即消散無痕